

जंगल रॉ पहचान

डॉ. मनाज़िर आशिक़ हरगानवी



जंगल रों पहचान

जंगल रों पहचान

उर्दू बाल-उपन्यास केरों अंगिका रूपान्तर

डॉ. मनाज़िर आशिक़ हरगानवी

अंगिका अनुवाद

डॉ. अमरेन्द्र

प्रकाशक

निराली दुनिया पब्लिकेशन्स

३५८-ए, बाजार देहली गेट, दरियागंज, नई दिल्ली-११०००२

फोन : ०११-२३२७६०६४, मोबाईल : ९८११२७०३८७

पुस्तक : जंगल रौ पहचान
लेखक : डॉ. मनाज़िर आशिक़ हरगानवी
अंगिका अनुवाद : डॉ. अमरेन्द्र
संस्करण : ई. २००६
मूल्य : ५० रुपये
मुद्रक : एम. आर. प्रिंटर्स, नयी दिल्ली-२

पुस्तक मिलने के अन्य पते

- कोहसार, भीखनपुर-३, भागलपुर-८१२००१ (बिहार)
- कामायनी, लाल खां दरगाह लेन, सराय, भागलपुर-८१२००१ (बिहार)

FAISAL KERO JASUSI By Dr. Manazir Ashiq Harganvi
ANGIKA TRANSLATION By Dr. Amrendra

प्राध्यापक, साहित्यकार
मित्र
डॉ. कय्यूम अंसारी
कॅ ई बाल उपन्यास समर्पित ।

—अमरेन्द्र

ई उपन्यास के बारे में

तोरा सिनी जानवे करै छै कि जंगल की छेकै ।

जंगल रों लकड़ी, पत्ता, फल आरो फूलों सें तोरा सिनी परिचिते छै । जंगल रों जानवर आरो पक्षियो सिनी सें तोहें अनभिज्ञ नै छै । यहू पता होतौं कि फूलन देवी हेनों डाकू जंगले में रहै छेलै आरो बहुत बड़ों स्मगलर वीरप्पन के बारोहो में जानतहैं होभौ कि वहू जंगले में रहै छेलै ।

तोरा सिनी के आपनों जासूस फैसल रों वास्ता अबकी दाफी जंगल रों एक स्मगलरे सें छै, जे स्मगलर सरकारी सम्पत्ति के लूटै छै आरो बड़ी चालाकी सें ओकरो बेचियो आवै छै । ऊ खतरनाको कम नै छै । केकरो जान लै लेवो ओकरा वास्तें आसान बात छेकै । धन्वा-मन्वा जंगल रों स्मगलर के ऊ सरदार तांय फैसल रों पहुँच केना होलै आरो वें ओकरा गिरफ्तार केना करलकै—ऊ सब ई उपन्यास में पढ़ों आरो दंग रही जा । ब्रेशा, दानिश आरो इन्सपेक्टर यहू उपन्यास में आपनों मौजूदगी के एहसास करैतें रहथौं । इन्सपेक्टरें चीता के शिकार के जे आपबीती सुनैलें छै, वहू कम दिलचस्प नै छै । मजा ला, सबक भी ला आरो आपनों राय्यो लिखों । तोरों राय के इन्तजार रहतै ।

—मनाज़िर आशिक्र हरगानवी

सम्पर्क : सम्पादक कोहसार

बरहपुरा, भागलपुर 812001 (बिहार)

फोन : ०६४१, २४२३६३३

मो. नं. : 9430966156

अनुवादक रॉ बात

‘फैसल रॉ जासूसी’ के बाद ‘शिकार आरो शिकारी’ आरो आबें ‘जंगल रॉ पहचान’ । ‘शिकार आरो शिकारी’ तें बच्चा सिनी लें खूब मनोरंजक रहवे करलै, मतरकि ‘फैसल रॉ जासूसी’ आरो कहीं लोकप्रिय रहलै ।

अंगिका में पढ़ै-लिखै वाला बच्चै सिनी की, जुअनकौ आरो बूढ़ौ चाव लैलै कें दोहरैलकै, तिहरैलकै । वहीं सें प्रभावित होय कें हम्में उर्दू के मशहूर लेखक डॉ. हरगानवी के एक आरो लोकप्रिय बाल जासूसी उपन्यास ‘जंगल रॉ पहचान’ कें अंगिका में प्रस्तुत करी रहलौ छियै । जे फैसल रॉ जासूसी के अगला कारनामा छेकै ।

जों ई कारनामा बालपाठक सिनी कें रुचलै, तें फेनू तेसरो कारनामा ऐतै—आरो दिलचस्प, आरो रोमांचित करै वाला कारनामा । मतरकि पहिलें ई बतैय्यौ कि फैसल रॉ ई कारनामा कैन्हों लागलौं । तभिये कुछु आरो आगू ।

—डॉ. अमरेन्द्र

3 सितम्बर 2009

सम्पादक : वैखरी
लाल खां दरगाह लेन, सराय,
भागलपुर—812002 (बिहार)
दूरभाष—0641, 2620067,
मोबाइल—9939451323

जंगल रों पहचान

संझ की बेरा । तखनी पाँच बजै छेलै । नामी जासूस फैसल घरों
सें निकलै के तैयारी करी चुकलों छेलै, तखनिये फोन रों घंटी बजी
उठलै । वैं उपेक्षा सें फोनो दिश देखलकै । फेनू आगू बड़ी कें
रिसीवर उठाय लेलकै आरो बोललै, “हेलो ।”
हम्मं दानिश बोलै छियों ।”

“हों, बोलों की बात छेकै ?”

“हम्मं एक ठो लहाश के बारे में खबर दै लें चाही रहलों
छियों ।” हुन्नं सें आवाज ऐलै ।

“लहास ।” फैसल रों आवाज बदली गेलै ।

“जी हों, धन्वा मन्वा वाला जंगल रों रास्ता के सड़कों पर
पड़लों होलों छै ।”

“तोरा केना पता चललों ? ”

“हम्मं जानै छियै कि तोहें डॉटभौ आरो कहभौ कि जबें
शिकार खेलवों मना छै, तबें हम्मं कैन्हें गेलियै । मजकि की करतियै,
हम्मं बेहद बोर होय रहलों छेलियै, यही लें शिकार के गरज सें हुन्नं

निकली पड़लियै । आरो जबें लौटी रहलौं छेलियै, हमरौं नजर सड़क के किनारी पड़लौं होलौं एकटा बोरा पर ठहरी गेलै । हममें गाड़ी रुकवाय कें देखलियै । देखलियै तें चौकी गेलियै । बोरा में एक ठो लहास छेलै ।” दानिशें एक्के साँस में ई सब बोली गेलै । “तोहें असकल्ले छेलौं ?”

“जी नैं, हमरौं साथ अप्पू छै ।”

“अप्पू के ?”

“वहें, डाक्टर आशीष सिन्हा रौं लड़का ।”

“अच्छा, अच्छा; गाड़ी केकरो छेकै ?”

“डाक्टर सिन्है साहबे केरो छेकै ।”

“तोहें बोली रहलौं छौं कहाँ सें ?”

“अंगिका पेट्रोल पम्प सें बात करी रहलौं छी । की तोहें आवी रहलौं छौ ?”

“हौं, हममें आवी रहलौं छियौं । की तोहें लहाश कें आँखी सें देखलौ ?”

“जी नैं, लहास तें बोरा में कोचलौं होलौं छै । हममें बोरा सें लहाश नैं निकाललें छियै ।”

“तोहें पेट्रोले पम्प लुग रहौं, हममें आवी रहलौं छियौं ।” ई कही फैसल नें फोन राखी देलकै आरो एक मिनट लेली कुछ सोचतें रहलै, आरो फेनू इन्सपेक्टर अंजनी शर्मा कें फोन लगैलकै । हुन्नें से ‘हैलौं’ के आवाज ऐलै तें फैसल बोललै, “हममें फैसल बोलै छियै ।”

“हौं सर, बोलियै, की बात छेकै ? इ वक्ती ? कोय खास प्रोग्राम छै की ?” “बहुते खास ।” फैसल टेलीफोन पर मुस्कैलै आरो फेनू बोललै, “एक ठो लहास रौं आवभगत करना छै । तहूँ चलौं । अंगिका पेट्रोल पम्प रौं नगीच पहुँचना छै । हममें वांही तें निकली रहलौं छीं ।”

“मतरकि है लहास.....?” इन्सपेक्टर रौं फेनू पूछलें छेलै ।

“लहास के बारे में जानकारी तें घटना तक पहुँचला रौं बादे

मालूम हुए पाँरें । तौहें जल्दी-सें-जल्दी वै ठां पहुँचौं ।”

हौ दिन ब्रेशा आपनौं एक सहेली कन गेलौं होलौं छेलै, यही लें फैसल अकेल्ले धन्वा-मन्वा जंगल दिश रवाना होय गेलै ।

जखनी फैसल अंगिका पेट्रोल पम्प नगीच पहुँचलै, तखनी तांय इन्सपेक्टर शर्मौं वै ठां हाजिर होय चुकलौं छेलै । फेनू की छेलै दानिश रौं अगुवाई में सब आगू दिश बढ़ी गेलै । इन्सपेक्टरें जानकारी देलकै कि पुलिस फोटोग्राफरो पीछू-पीछू आवी रहलौं छै ।

लहास के नगीच पहुँची कें फैसल नें हिन्नें-हुन्नें देखलकै । दूर तांय आबादी रौं कोय नामो-निशान तक नै छेलै । रास्ता एकदम सून-सपाट छेलै । वै ठां सें करीब-करीब दो मील आगू सें जंगल रौं सिलसिला शुरु होय गेलौं छेलै । रेलवे लाइन नगीचे सें गुजरलौं छेलै, जै पर एक रेलगाड़ी धड़धड़ैलें होलें गुजरवौं करी रहलौं छेलै ।

“एक बात समझै में नै ऐलै कि है लहास यहाँ केना ऐलै ।” इन्सपेक्टर चुप्पी तौंड़तें बड़बड़ैलै ।

“अभी बहुते बात समझै में नै ऐतौं । ई लहास केकरो छेकै ? अभी तें हम्में लहास के बोरा खोलियो कें नै देखलें छियै कि है लहास कोय मरद के छेकै आकि जनानी रौं, जवान रौं छेकै कि बच्चा रौं, आकि बूढ़ा रौं छेकै ।” फैसल बोललै ।

“हौ ई बात तें छै, पहिलें लहास कें तें देखी लौं ।”

“ठीक छै, तें तौहें बोरा सें लहास कें निकालौं ।”

फैसल रौं कहना भर छेलै कि इन्सपेक्टरें बोरा कें नीचें सें पकड़ी कें उलटी देलकै ।

आबे लहास सामना में छेलै आरो लहासो केहनौं—बिना सिर के । देखहैं सब चौकी पड़लै । बिना सिरवाला ऊ लहास कोय मरद रौं छेलै । हाथ सुनहला रंग रौं छेलै आरो नाखुन चौड़ा-चौड़ा । हाथौं के नस सिनी उभरलौं होलौं छेलै । अंगुली सिनी रौं पोर घिसलौं होलौं छेलै । गोड़ो के हालत ओकरा सें बढ़िया नै छेलै । हाथ आरो गोड़ के अंगुली सिनी रौं ऊपर कुछ गुल्ली-गुल्ली छेलै । देहौं पर जे लिबास छेलै,

वहू दामी नै छेलै ।

फैसल नें लहास कें जाँचला-परखला रों बाद कहलकै, “ई लहास कोनो मजूर के मालूम होय छै । एकरों कलाई देखी रहलौ छौ नी, कतें मजबूत आरो चौड़ा छै । हेनों बुझावै छै कि है लहास खुदाई करै वाला कोय आदमी रों छेकै, आकि ई आदमी भारी बोझों ढोय के काम करे छेलै ।

“मतरकि एकरों मूड़ी कथी लें काटलौ गेलै ?” दानिशें पूछलकै ।

“ताकि लहास रों पहचान ने हुँए पारें । एकरों पहचाने खतम करै के उद्देश्य सें एकरों मूड़ी काटी लेलौ गेलौ छै ।

“आरो लहास यहाँ लानी कें फेकी देलौ गेलौ छै ।” इन्सपेक्टर बात कें पूरा करते बोललै ।

कि तखनिये फोटोग्राफर वैठां पहुँची गेलै ।

“इन्सपेक्टर साहब, लहास रों पोस्टमार्टम जल्दिये करवाय लें आरो शहर के आस-पास रों सब्भे थाना सिनी सें ई बात के खोज-खबर लौ कि कोय्यो केकरो गुमसुदगी के रिपोर्ट तें दर्ज नै करवलें छै ।” फैसल हिदायत दिँए लागलौ छेलै, एक क्षण रूकी कें फेनू कहलकै

“आबें हम्में जैभों ।”

“आरो हमरा लें की हुकुम छै ।” दानिशें पूछलकै ।

“अभी तें मामला उलझलौ होलौ छै । पोस्टमार्टम रिपोर्ट आकि थाना सें गुमशुदगी रों रिपोर्ट मिलला रों बादे कोय कदम उठैलौ जावें सकै छै । अभी तें हम्में एकदम सें अन्हारों में छीं ।”

“तोहें ई वक्ती कहाँ जाय रहलौ छों ?”

“घोंर लौटी जैवै ।”

“आरो अप्पू जी तोरों की हाल छै ? तारों माय-बाबू तें छीक छौं नी ? हुनका सिनी कें हमरों नमस्कार कहियौ आरो तोहें यहू शिक्षा ला कि आइन्दा सें शिकार पर नै ऐवौ । पकड़लौ जैवा तें कानून सजाय देतौं । टीवी आरो अखबारों में फिल्मी हीरो सलमान खान रों

परेशानी देखिये,पढ़िये रहलौ होभौ ।”

“जी आइन्दा सें कभियो नै ऐवै । मतरकि एक बात हम्में कहै लें चाहै छियै, शायद आपनें रों काम के हुँ ।”

“हों, हों बोलौ ।”

“हौ ई बात छेकै कि जखनी हम्में शिकार खेलै लें अन्दर गेलौ छेलियै, तखनी ऊ सब आदमी सड़क रों किनारी, झाड़ी में कुच्छू खोजी रहलौ छेलै ।”

“मतरकि हम्में तें कुछुवे नै देखलें छेलियै ।” दानिश चकरैतें बोललै ।

“तखनी हम्में एक ठो कबूतर रों पीछा करी रहलौ छेलियै, जे ठारी-ठारी उड़ी रहलौ छेलै ।”

“ओहो, तोहें ऊ सब आदमी कें कहाँ पर देखलौ, आरो ऊ सब केन्हों आदमी छेलै ?”

“हम्में जंगल रों बहुत्ते भीतर नै गेलौ छेलियै । किनारिये सें कुछ भीतर शिकार खोली-खाली लोटी रहलौ छेलियै । तखनिये दू आदमी हमरा नजर ऐलौ छेलै । यही सड़कों के सीध में—हौ जे कच्चा रास्ता भीतर गेलौ होलौ छै । हों एतना कहें पारौं कि ऊ दोनों देखै में भला आदमी नै लागी रहलौ छेलै “की तोहें ऊ दोनों कें गौर सें देखलें छेलौ ?”

“नै, बस हेन्हें कें दोनों पर नजर पड़ी गेलौ छेलै । ऊ दोनों वहाँ ठहरलौ नै छेलै । कुछ देखतें-सुनतें किनारी-किनारी बागू बड़ी गेलौ छेलै ।”

“की तोहें ऊ जग्घों दिखावें पारौं ?”

“कैन्हें नी । चलौ ।”

फैसल नें दानिश दिश देखलें छेलै । फेनू फैसल, दानिश आरो अप्पू तीनों गाड़ी में बैठी गेलौ छेलै । तें इन्स्पेक्टर शर्मा नगीच आवी कें फैसल सें बोललै, “हम्में लहास उठवाय कें ये ठां सें लौटी जैवै ।”

“ठीक छै । हम्में जरा आगू तांय जाय छियौं । पन्द्रह-बीस

मिनटों में लौटी ऐलियों, तबें तें साथें चलवों आरो जों देर होय जाय छै, तें तोहें इन्तजार नै करियों ।” एतना कही फैसल ने गाड़ी इस्टार्ट करी देलकै ।

“हिन्नें ट्रैफिक बहुते कम रहै छै ।” अप्पू बोललै

“हौ रास्तो सुनसान छै, फेनू ई आम राजमार्ग भी तें नै छेकै । ई रास्ता सें मोटरगाड़ी खाली चतरा लेली जाय छै, वहू में एक्के बजे दिन तांय । फेनू ई इलाका नेक्सलाइट एरियो छेकै । ई जंगल में डाकुओ रहै छै—हमरा ई सब मालूम छै, यही कारण छेकै कि ट्रैफिक नै के बराबर चलै छै । होना कें कें एक ठो रेलगाड़ी जरूरै जंगलों के बीचों सें निकले छै ।

“ई जंगल बहुत खतरनाक बुझावै छै ।” दानिशें जंगल दिश देखतें कहलकै ।

“एतनै नै, यैमें खतरनाक जंगली जानवरो कम नै छै ।” फैसल ने बतैलकै ।

“बस गाड़ी कें यही ठां रोकी दौ, यही ऊ जग्घों छेकै ।” अप्पू ने गाड़ी रोके के इशारा करतें कहलकै ।

गाड़ी रूकी गेलों छेलै आरो सब के सब गाड़ी सें नीचें उतरी गेलै । अप्पू फेनू अंगुली सें इशारा करतें कहलें छेलै, “यही हम्में हौ दोनों आदमी कें देखलें छेलियै । यही रास्ता सें ऊ दोनों आगू बढ़ी गेलों छेलै ।”

जखनी फैसल, दानिश आरो अप्पू ई जग्घों लें चललें छेलै, तखनिये दिन ढलै पर होय चललें छेलै, आबें तें साँझो उतरै पर छेलै ।

“आबें अन्धेरा होय चललें छै । ई वक्ती आबें आरो आगू जैवों ठीक ने होतै । जों मौका मिललै तें कोय्यो दिन आकि कल्हे आवी जैवै, मजकि इखनी चली चल्लो ।” वापसी वक्ती इन्सपेक्टर पम्प रों पास नै दिखलै, ऊ लहास उठाय कें जाय चुकलें छेलै ।

गाड़ी अंगिका पेट्रोल पम्प के नगीच रोकी कें फैसल नें दानिश

आरो अप्पू के उतारलकै, जहाँ पर अप्पू रों कार खाड़ों छेलै ।

फैसल आगू बड़ै के भाव में ऐलै, तें अप्पू नें गाड़ी के डिककी खोलतें कहलकै, “कै एक ठो हारिल आरो तीतर हाथ लागलों छै, दू-चार तहूँ लै लें नी ।”

“जों ज्यादा छों तें दै दा । शिकार के तें हम्मूओं शौकिन रहलों छियै । जंगली चिड़िया आरो जंगली जानवर रों मजा कुछ आरुवे होय छै । वहू में हारिल के की कहवों । चिड़िया में सबसे स्वादिष्ट माँस हमरा हारिले के लागै छै । हारिल हेनों पंछी छेकै, जे जमीन पर ने उतरै छै । कहावत छै कि पानी पियै लें जबे ई उतरै छै तें गाछ के कोय छोटों रं ठाहरु आपनों पंजा में फँसैये के उतरै छै । आरो वही पर पैर रखी के पानी पीयै छै ।”

दानिश आरो अप्पू से अलग होय के फैसल सीधे घोर आवी गेलै ।

पोर्टिको में गाड़ी खड़ा करी ऊ बाहर ऐलै, तें देखलकै बरान्दा पर कुर्सी पर बैठलो ब्रेशा स्वेटर बुनी रहलों छेलै ।

“ई वक्ती कहाँ से तोहें आवी रहलों छों ?” ब्रेशा स्वेटर बुनतें-बुनतें पूछलकै ।

“एक लहासों के पासों से ।”

“बस, शुरु होय गेलौ । तोरा पर तें दिन-रात जासूसिये सवार रहै छों । कभियो तें ढंगों के बात करलों करों ।”

“अरे, हम्में गलत कहाँ बोली रहलों छियै । तोहें हमरों सेकरेद्री होय के ई तरीका से बात करभौ । जरा मर्यादौ के तें ख्याल करों ।”

“ई वक्ती हम्में ड्यूटी पर थोड़े छियै आरो नै आफिसे में छी ।”

“थै से की होय छै !”

“बहुत कुछ होय छै । कभियो तें लहास, खून, चोरी-डकैती से हटी के बात करलों करों । अच्छा बतावों कि गेलों कहाँ छेलौ ?”

“बतैलियों नी, कि एक ठो लहास के खबर मिललों छेलै ।”

“कहाँ ?” ब्रेशा संभली कें बैठी रहलै ।

“धन्वा-मन्वा रों जंगल रों नगीच । दानिशें लहास देखी कें खबर करलें छेलै ।”

“मजकि दानिश वहाँ की करी रहलें छेलै ?”

“डाक्टर आशीष सिन्हा रों बेटा अप्पू साथें शिकार खेलै लें गेलों छेलै । वापसी वक्ती वें जंगल रों करीब लहास देखलकै । बस वहीं सें सीधे आवी रहलें छी । पोस्टमार्टम लेली इन्स्पेक्टर अंजनी शर्मा लहास कें लै गेलै ।”

“आरो लहास केकरो छेकै ?”

“यहें तें कहना मुशिकल छै । लहास के मुड़िये गायब छै । खाली धड़े मिललें छै । ओकरो पहचान के कोय तरीका नजर ने आवे छै ।”

“धन्वा-मन्वा के जंगल तें दिन-ब-दिन खतरनाके होलों जाय रहलें छै । आय हम्में फरहत यहाँ इस्लामनगर गेलों छेलियै, वहीं करीमगंज रों बेनजीर भी पहुँचलें होलों छेलै । वै धन्वा-मन्वा जंगल रों जिकिर छेड़ी छेलें छेलै ।”

“मजकि वहाँ जंगल रों जिक्र केना उठलै ?”

“तोरा शायत मालूम हुएँ, बैगन तोड़ी कें मालगाड़ी सें सामान चोरी करै के घटना आयकल यहाँ बहुते होय रहलें छै ।”

“हों, कोय हमरा बतैनें छेलै, मतर हम्में वै दिश ध्यान नै छेलें छेलियै । मतरकि मालगाड़ी सें सामान चोरी जाय के बात के संबंध जंगल सें की छै ?”

“छै, आखिर मालगाड़ी तें धन्वा-मन्वा के जंगल के करीबे सें गुजरै छै ।”

“अच्छा ।”

“हों, हर साल लाखो कीमत के सामान गायब होय जाय छै आरो ई सिलसिला पिछुलका पाँच-छों सालों सें जारी छै ।”

“आरो हम्में यैं सें बेखबर छियै ।”

“ई बात छै कि हम्मैं हत्या के केस ज्यादा देखै छियै, यही लें पुलिसौं हमरा सिनी कें खबर नै दै छै । होन्हौ कें ई मामला पुलिसे के छेके आरो हमरा सिनी सी. आई. डी में छियै ।”

“ठीक बात छै, मतरकि नुकसान तें हमरों देशे के होय रहलौ छै । सोचौं, कतें जनता परेशान रहतें होतै आरो रेलवे विभाग हर्जाना भरतें-भरतें आजिज होय गेलौ होतै । पाँच-छौ सालों के वक्त बहुते होय छै ।”

“हों, ई बात तें छै, तबें फेनू ?”

“फेनू ई कि हम्मैं फिकिरमन्द होय गेलौ छियै । हमरा कुछ करै लें होतै ।” “हमरा ई सब अइये मालूम होलौ छै । फरहत के घरवालां बतैलकै । हुनका सिनी पता लगैनें छै कि करीमगंज मुहल्ला में बैगनब्रेकर रहे छै ।”

“जों सच्चे में करीमगंज मुहल्ला में बैगनब्रेकर छै तें फरहत के घरवाला के एकरों जरुरे जानकारी होतै । हमरो जान-पहचान रों वहाँ के ठो लोग छै । चक्रधर सिंह, मिथिलेश झा, साथी सुरेश, धनञ्जय मिश्र, श्याम लाल आनन्द आरो के एक ठो लोग वही मुहल्ला में रहै छै ।”

“हम्मैं फरहत आरो हुनको घरवाला सें पूछलें छेलियै ।”

“तें हुनका सिनी की कहलकै ?”

“यही कि बैगन तोड़ैवाला कुछ लोग तें वहाँ जरुरे छै जेकरा मुहल्ला वालां आपनों भाषा में झिरकटिया कहे छै ।”

“ऊ सब रों पहचान केना होलै ?”

“ऊ सब चोरी के माल बिक्री करै छै । बड़ों पैमाना पर तें ऊ सब कहीं आरो बिक्री करै छै, मतर मुहल्ला रों लोगे सर्ट-पेंट रों कपड़ा, घड़ी, कलम, बस हेने किसिम के जरुरत भर के चीज सिनी ऊ सब सें खरीदतें रहै छै ।”

“आय तहूँ कारनामा करी दिखैलें छौ ।” फैसल ने ब्रेशा के तारीफ में कहलकै ।

“केन्हों कारनामा ?”

“यहें, झिरकटिया के बारे में जानकारी दै केँ । है कारनामा सेँ कोय्यो कम छै की । हममें देखवै कि चोरी के है सिलसिला हममें केना बन्द करावै सकै छियै ।”

“हर मामला में टाँग अड़ैवों तें तोरों आदत बनी गेलों छीं ।”

“आबें आपनों प्रकृति केँ हममें की करौं ब्रेशा, जैठां देश आरो राष्ट्र के बात आवै छै, हमरों खून में उबाल आवै लागै छै ।”

“मजकि एक बात हमरों समझ में नै ऐलै कि करीमगंज रों दू, चार, दस लुच्चा-लफंगा आदमी बैगन केना तोड़ी लै छै आरो माल के की करै छै ?” ब्रेशा बड़बड़ैलों छेलै ।

“ई काम दू-चार लोगों के नै लागै छै । बेशक यैमें एक पूरा गिरोह काम करी रहलौं होतै, आरो ई गिरोह बेहद खतरनाक मालूम होय छै । करीमगंज के जे लोग कपड़ा, घड़ी आरनी बेचै छै, ऊ तें मामूली किसिम के कार्यकर्ता छेकै ।”

“हूँ, तोरों ख्याल एकदम दुरुस्त बुझावै छीं ।”

“अरे, आबें तोहें स्वेटर बुनवों बन्द करौं । जबें देखों, कुछ-न-कुछ बुनतै रहै छौं । अँगुली केँ मशीन बनाय रखलें छौ । ई सब काम बड़ी-बूढ़ी केँ शोभै छै । तोरों अम्मा बोलै छीं तें अच्छा लागै छै । तोरों उम्र अभी है सब काम करै के लायक नै होलौं छीं । कथी लें जानी-बुझी केँ आँख के रोशनी खतम करै पर तुललौं छीं ।”

“वाह, तोरा कथी लें बुरा लागै छीं । ई हमरों निजी मामला छेकै ।”

“ठीक छै, जों है तोरों निजी मामला छेकौं, तें तोहें एकरा आपन्हें तक सीमित रखौं । हमरों सामना नै बुनलौं करौं ।”

“आबें ई जबरदस्ती नै छेकै तें की छेकै ।”

“अरे हों, हममें तें भूलिये गेलों छेलियै । कै ठो हारिल आरो तीतर गाड़ी के डिककी में रखलौं होलौं छै, दानिश आरो अप्पू छेलै छै । की तोरा पकावै लें आवे छीं ?”

“भोलू तें छै, वही पकाय देथौं ।”

“हम्में तोरा सें पूछी रहलौ छियौं आरो तोहें नौकरों पर टाली रहलौ छौं ।”

“हम्में पकावै के कला तें राखै छियै मजकि ई वक्ती ?” कुछ टारै के भाव सें ब्रेशा बोललै ।

“तें कोय बात नै । ई लै जा, इखनी एकरों नली आरनी निकाली कें फ्रिज में रक्खी दौ ताकि खराब नै होय जाय । भोरे नाश्ता आरो खाना में मजा लै-लै कें खैवै ।”

“हमरो हिस्सा ?”

“बचलौ-खुचलौ हड्डी सब तोहें लै लियो, आरो की ।”

ब्रेशा बड़ी खामोशी सें उठलै आरो शिकार लै कें आगू बढ़ी गेलै । ओकरो क्वार्टर बगले में छै । माय-बाबू रों साथ रहै छै ।

फैसल नें ब्रेशा सें जाय सें ने रोकलकै, कैन्हें कि आरो दूसरो ठेरे काम निपटाना छेलै । फेनू आयको लहासों के बारे में सोचना छेलै । बैगन तोड़ी कें माल निकाले वाला के बारहो में सोचना छेलै ।

अगला सुबह अभी नास्ता करी कें फैसल चाय के इन्तजार करी रहलौ छेलै आरो तुरत आयको अखबार देखिये रहलौ छेलै कि इन्सपेक्टर साहब आवी गेलै ।

“आबें ला, एकदम भोरे-भोर हिनी टपकी पड़लै ।” ब्रेशा इन्सपेक्टर कें देखियै बड़बड़लै ।

फैसल नें चौंकी कें देखलकै आरो इन्सपेक्टर अंजनी शर्मा कें देखथें बोललै, “आवों, आवों इन्सपेक्टर साहब ।”

“लहास लै ऐला रों बाद कल शाम बड़ी हंगामा होय उठलै” इन्सपेक्टर बैठतें होलें बोललै, “धन्वा-मन्वा के इलाका शेरघाटी थाना में पड़ै छै । हम्में ओकरा खबर नै करलियै । जबें पता चललै तें थाना इन्चार्ज शाहिद दौड़तें होलें ऐलै आरो वैं हमरा सें शख्त आवाज में कहलकै । ऊ बोली रहलौ छेलै कि ‘लहास रों जिम्मेदारी ओकरो छेलै, हम्में सी. आई. डी वाला ओकरा में कैन्हें दखलअन्दाजी करलियै ।’

एतना होला पर हम्में लहास ओकरो हवाला करी देलियै ।”

“ई तोहें गलत करलौ । कम-से-कम टेलीफोन करी केँ हमरा सेँ पूछी तें लेतियौ । जबें हम्में दखलअन्दाजी करी चुकलौ छेलियै, तें पोस्टमार्टम तांय लहास केँ आपनों कब्जा में रखना छेलै आरो फेनू ओकरा सख्त आवाज में बोलै के हिम्मत केना होलै ।” कहतें-कहतें फैसल रौं चेहरा गुस्सा सेँ लाल होय उठलै “हों, हमरा सेँ गलती होय गेलै ।” इन्सपेक्टर नजर झुकैतें बोललै ।

“तोहें हेनों करों कि यहीं से फोन करी केँ शाहिद सेँ पोस्टमार्टम रिपोर्ट माँगों ।”

फैसल के बोलना भर छेलै कि इन्सपेक्टरें नम्बर डायल करलकै आरो कुच्छू देर लें रिसीवर कानों सेँ लगैलें राखलकै आरो फेनू बोललै, “हम्में इन्सपेक्टर शर्मा बोली रहलौ छी । कल वाला लहास रौं पोस्टमार्टम रिपोर्ट ऐलै ?”

“लहास तें ओकरो वारिश के हवाला करी देलौ गेलै आरो अभी तांय ऊ गली केँ राखो होय चुकलौ होतै ।”

“की लहास के बारे में जानकारी मिली चुकलौ छै ?”

“जी हों, जोँ मालूम नै होतियै तें ऊ वारिश के हवाला केना होतियै ।”

“लहास केकरो छेलै आरो वारिश सिनी लोग के छेकै ?”

“ई सब तोहें कैन्हें पूछी रहलौ छौ ?”

“आपनों जानकारी वास्ते ।”

“मतर है जानकारी तोहें कैन्हें चाहै छौ, जबें कि छानबीन हमरा करना छै ।”

“तोहें ई तें बतावों कि हत्या के कारण मालूम होल्हौ ?”

“अभी नै, खाली एतन्हें पता चललौ छै कि ऊ लकड़ी काटे लें जंगल रौं दिश गेलौ छेलै ।”

“ऊ छेलै के, हमरा एकरोँ जानकारी चाही ।”

“हम्में नै बतैभौं ।”

“जरा होल्डऑन करले राखों ।”

इन्सपेक्टर नें फोन पर हाथ रखी कें फैसल कें सब बात बतलकै । सुनहैं फैसल नें इन्सपेक्टर के हाथों सें रिसीवर लेतें बोललै ।

“हेलो, हम्मं फैसल बोली रहलौ छी । हमरा बिना सिरवाला लहास रों जानकारी चाही ।”

“कैन्हें ?”

“ओकरों हत्या के कारण के खोजबीन लें ।”

“छानबीन हम्मं करी रहलौ छियै । यै में तोरों दखलअन्दाजी नै हुए तें अच्छा होतै ।”

“ई तोहें बोली रहलौ छौ ।”

“आपनों बोली दुरुस्त करों, हम्मं उमर में तोरा सें बड़ों छियौं ।”

“ठीक छै ।” फैसल नें टेलीफोन राखी देलकै । गुस्सा सें ओकरों मुँहों सें कोय आवाज नै निकललै । ऊ पीठी पर हाथ बाँधलें कोठरी में टहलें लागलै । ब्रेशा सहमी गेलों छेलै आरो इन्सपेक्टर खामोश छेलै ।

बहुते देर बाद फैसल बोललै, ।” शाहिद के शामत आवी गेलों छै । नै मालूम, ऊ कौनी भ्रम में छै । हम्मं झगड़ा नै चाहै छियै, मजकि हमरा एकरों रवैया सें दुःख पहुँचलौ छै, खैर ई वक्ती इन्सपेक्टर साहब तोहें हेनौं करों—शेरघाटी थाना में अबदुल्ला नाम के एक सिपाही छै, केकरौ भेजी कें ओकरा बुलवाय ला । हमरों हवाला दैय्ये कें बुलवैयौ, ऊ तुरते आवी जैतै ।”

“हम्मं अभिये केकरो वहाँ भेजै छियौं ।” इन्सपेक्टर शर्मा उठतें हुए बोललै । इन्सपेक्टर के जैहैं ब्रेशा पूछलकै, शाहिदें की कहलकौं ?”

“ओकरों दिमाग बहकी गेलों छै । हमरा हौ लहास के बारे में जानकारी दै सें मुकरी गेलै । होना कें सब्भें ई जानै छै ककि हम्मं हमेशै सें पुलिसवाला कें मददे करतें ऐलौं छियै ।”

“कल हमरा यहू पता चललौ छेलै कि शेरघाटी थाना में

आपनों बदली लेली जमादार आकि सब इन्सपेक्टर पैरवी करते रहै छै आरो टाका के बल्लों पर वै थाना में पहुँची जाय छै ।” ब्रेशा बतलकै ।

“आखिर ऊ थाना में हेनों की बात छै ?”

“हमें की जानौं ।”

“आबे अबदुल्ला आवी जाय, तब्बे हमें कोय हरकत में आवे पारौं । हमरा कन्हौं से कोय ओर तें मिली जाय, फेनू तें सब्भे गुन्थी सामना में आबी जैतै ।

अभी फैसल रौं बात ठीक से खतमौ ने होलौं छेलै कि तखनिये मोटर साइकिल से दानिश वहाँ आवी पहुँचलै ।

“की कोय खबर ?” दानिशें पूछलकै, “हमें कॉलेज जाय रहलौं छेलियै, सोचलियै, तोरा से मिललें जाँव, की कलकों लहास के बारे में कुछ पता चललै ?”

“अभी तांय तें कुछुवो नै मजकि.....” आरो विस्तार से सब बात फैसल ने ओकरा बताय देलकै ।

अभी जाय लें दानिश उठियै रहलौं छेलै कि तखनिये इन्सपेक्टर शर्मा वहाँ आवी गेलै ।

“अबदुल्ला ऐतैं होतै, हेना के हमें ई खबर आनलें छियै कि लहास हीरा माँझी नामक आदमी रौं छेलै । ऊ करीमगंज में, मुहल्ला रौं सबसे किनारी हरिजन के झोपड़ी में रहै छेलै ।”

“वाह, ई काम के बात होलै, मजकि है जानकारी तोरा केकरा से मिललौं ?” “हमरो एक सिपाही करीमगंज मुहल्ले में रहै छै । वहाँ बतलकै । सोसे मुहल्ला में ऊ लहास रौं चर्चा छै ।”

“शाहिद बेशक बेवकूफ छै । वै केना ई समझी लेलकै कि हमरा लहास रौं बारे में विस्तार से जानकारी नै मिले सकतै ।” ब्रेशा बोललै ।

“अभी ओकरा छोड़ो । ई वक्ती हमरा सब सीधे करीमगंज पहुँचवै । दानिश तोहें कॉलेज जावै सकै छो । मजकि साँझे हमरा से मिली लियो जरुरै ।”

“हम्मू आपने के साथ चलै छियौं ।”

“नै, पढ़ाय पर पहले ध्यान दौ । तोरो लेली जासूसी अभी दूसरो दर्जा रो काम छेकै । पहलो काम शिक्षा के पूरा करवो छेकै । होना के खाली वक्तो में तोहे रहवे करै छो ।”

“ठीक छै” कही के दानिश कॉलेज दिश रवाना होय गेले आरो फैसल, इन्सपेक्टर, ब्रेशा, करीमगंज तरफे चली पड़लै ।

ठीक हरिजन सिनी के झोपड़ी के नगीच आवी के इन्सपेक्टरें जीप रोकी देलकै आरो तीनों नीचे उतरी गेलै ।

जीप के रुकना छेलै आरो तीनों के उतरना छेलै कि ढेर सिनी बच्चा आरो जनानियो झोपड़ी सिनी से झाँके लागलै । मुहल्ला के आरो-आरो बच्चा साथे नौजवानो जीप के नगीच सिमटे लागलो छेलै ।

फैसल ने एक नौजवान से पूछलकै, “यहाँ पर हीरा माँझी रो झोपड़ी कोन ठो छेकै ?”

“ऊ सामना में ।” नौजवान ने दूर एक ठो झोपड़ी दिश इशारा करलकै ।

“वहाँ आरो के-के रहै छै ?”

“ओकरो बीबी आरो ओकरा दू बच्चा ।”

नौजवान से आरो बात नै करी के फैसल ऊ झोपड़ी के नगीच पहुँची गेलै । एक ठो जवान जनानी आपनो उदास सूरत लेले दरवाजा पर ठाड़ी छेलै आरो दू छोटो-छोटो बच्चो ओकरो साड़ी पकड़ने ठाड़ो छेलै ।

फैसल ने ओकरो प्रति गहरा सहानुभूति दिखलैते कहलकै, “हमरा हीरा के हत्या होय गेला पर खुबे दुःख छै । हममें चाहै छियै कि हत्यारा जते जल्दी-से-जल्दी हुँ सके पकड़ाय जाय, यही ले हममें तोरो लुग ऐलो छियौं ।”

फैसल के बात सुनी के जनानी रो आँख छलछलाय ऐलै ।

“कानला से दुःख दूर होय वाला नै छै । तोहे हमरा ई बतावो कि हीरा के कोय दुश्मन ते नै छेलै ?”

जनानी मूड़ी हिलाय के नै बतैलकै ।

“हीरा काम की करै छेलै ?”

“जंगल में लकड़ी काटै छेलै ।”

“ओकरो अलावो आरो कोय काम ?”

“नै ।”

“तें फेनू आखिर ओकरो गर्दन कैन्हें कटाय गेलै ? कोय-न-कोय तें कारण होवे करतै । आरो तोहें हीरा के बीबी यानी पत्नी छेकौ, यही लें तोरा जरूरे एकरों ज्ञान होतौं । जों तोहें हमरा नै बताय छै, तें हत्यारा नै पकड़लौं जैतै । आरो यहू संभव छै कि वैं तोरा आकि फेनू तोरों बच्चाहौ कें कोय नुकसान पहुँचावें ।”

जखनी फैसल जनानी सें बात करी रहलौं छेलै, तखनी इन्सपेक्टर भीड़ कें वहाँ सें हटी जाय के निवेदन करी रहलौं छेलै ।

हुन्नं फैसल केरों निवेदनो जारी छेलै, “तोहें हमरा हीरा के बारे में सब कुछ बतावों । सोचवों आरो देर करवों मुनासिब नै छै । तोरों पति रों जिनगी एतें मामूली नै छेलै कि कोय ओकरा हमेशा लेली खतम करी दै आरो ओकरा सजैयो नै मिलें ।”

ई सुनी कें जनानी कपसतें होलें बोललै,” हुनी जंगल रों सरदार वास्तें काम करै छेलै ।”

“जंगल रों सरदार ।” फैसल नें अचरज सें पूछलकै ।

“हों, हमरों पति ओकरा जंगल रों सरदारे कहै छेलै । ऊ बड्डी मालदार आरो जालिम आदमी छेके । रेलगाड़ी कें लूटै छै । बड़ों-बड़ों दौलत वाला आदमी सें टाका वसूल करै छै । पुलिसो वाला ओकरा सें डरै छै ।”

“की है सब बात हीरा तोरा नैं बतैलें छेलौं ?”

“हों ।”

“वैं आरो की बतैलें छेलौं ?”

“यहू कि सरदार पुलिसवाला कें हर महिना देर सिनी टाका दै छै, यही लें पुलिस ओकरो खिलाफ कुछ नै करे छै ।”

“हीरा जंगल रों सरदार लुग केना पहुँचलै आरो वै सरदार लेली की काम करै छेलै ?”

“हुनी एक दिन जंगल में लकड़ी काटी रहलौ छेलै कि भयानक चेहरा रों एक ठो आदमी हुनको लुग ऐलै आरो वै मुँहों पर कारों कपड़ा लपेटी कें हुनका हेनो जग्घों लै गेलै, जेकरों बारे में हुनका कभियो पता नै चललै । वहाँ हुनका भयानक लोग सिनी नजर ऐलौ छेलै । ऊ भयानक आदमी हमरों पति सें कहलकै कि आय सें ऊ जंगल रों डाकू वास्तें काम करतै आरो इन्कार करला पर आकि केकरौ बतैला पर हुनका जान सें मारी देलौ जैतै ।”

“तोहें ई तें जानथै होभौ कि आखिर हीरा सें की काम लेलौ जाय छेलै ।”

“हुनका जंगल रों निगरानी के काम देलौ गेलौ छेलै । बाहरे रही कें हुनका हे देखै लें होय छेलै कि शिकार खेलै लें के-के लोग आवै छै आरो कहीं जंगल रों भीतर तें नै जाय छै । जो कोय जंगल रों भीतर शिकार खेलै लें जाय छेलै तें हमरों पति कें एक खास अन्दाज में लगलौ रस्सी कें तीन दाफी खीचै लें होय छेलै ।”

“ऊ गाछ के आगू की छेलै । हीरां हौ रस्सी रों मदद सें ऊ सब लोगों के बारे में पता लगावै रों कोशिश करलें छेलै आकि नै ?”

“हमरों पति ऊ लोग के खोजों में छेलै, शायत यहें लें मारलौ गेलै । हुनी आठमां क्लास पास छेलै आरो बड़ी सूझ-बूझ राखैवाला छेलै । हुनी तें हमरौ पढ़ै लें सिखैलें छेलै । हुनिये हमरा बतैनें छेलै कि हुनका हौ गाछ रों आगू जाय कें इजाजत नै छेलै । हुनका धमकियों देलौ गेलौ छेलै कि हौ गाछ के आगू गेला पर हुनका मारी देलौ जैतै ।”

“की हीरां तोरा ऊ गाछ रों बारे में कुच्छू बतैलें छेलहैं कि हौ गाछ जंगल में कै ठां छै ?”

“हों, हुनी बतैलें छेलै कि जंगल सें पूरब में एक मील आगू गेला पर जंगली बेरी रों एक झुण्ड छै, वही झुण्ड रों पश्चिम दिश शीशम रों एक बहुत ऊँच्चों गाछ छै । वही गाछ सें एक रस्सी लटकतें

रहै छै ।”

“है बात जानकारी वास्तें तोरा बहुते धन्यवाद....हों तें फेनू की होलै ।”

“हमरों पति बहुते दिनों तांय, लगभग डेढ़ सालों तांय, शिकारी रों निगरानी के काम करते रहलै । फेनू एक दिन, जबें हुनी रस्सी कें हिलावै लें शीशम गाछ लुग पहुँचलै, तें हे देखी कें दंग रही गेलै कि दुकानी में बिकै वाला बहुते सब बोरा, कपड़ा रों गट्ठर आरो दूसरों सब सामान रखलें होलें छेलै, जे सिनी उठाय-उठाय कें दस-बारह आदमी गाछ रों आगू लै जाय रहलें छेलै । वै सिनी लोगे जबें हमरों पति कें देखलकै, तें हुनका पकड़ी लेलकै... पहिलें तें हुनका मारलों-पीटलों गेले, मतरकि जबें हुनी वै ठां आपनों मौजूदगी रों कारण बतैलकै तें हुनको आँखी पर कारों पट्टी बाँधी कें फेनू वहा जग्घों पर लै गेलों गेलै, जहाँ हुनी पहिलों दाफी पहुँचैलों गेलों छेलै । वहाँ हुनका बहुते देर तांय रोकलों गेलै । शायत हुनको बात के जाँच-पड़ताल लेली एक आदमी जंगल भेजलों गेलों छेलै कि भीतर कोय शिकारी पहुँचलों छेलै कि नै । जबें हमरों पति के सच्चाई साबित होय गेलै, तें हुनका है हिदायत मिललै कि आइन्दा सें जबें भी मालगाड़ी के लूट हुएँ, तें सामान ऊ गाछ सें शीशम गाछ तांय पहुँचाय देलों करै ।”

“है काम लेली हीरा कें वेतन की मिलै छेलै ?”

“पाँच हजार टाका महीना ।”

“तभियो तोरा सिनी ई झोपड़ी आरो गन्दगी में कैन्हें बसलों होलों छै ?”

“जंगल के सरदार के यहाँ हुकुम छेलै कि हमरा सिनी यहेँ झोपड़ी में रहैं ताकि केकरौ कोय किसिम के शक नै हुएँ । हमरों पति रोजे-रोज जंगल सें लकड़ी लानै छेलै, जे लैकें बेच्छौ लें जाय छेलियै । हेनों जोखिम के काम करल्लहौ पर आरो टाका रहल्लहौ पर हमरा सिनी नै अच्छा खावें सकै छेलां आरो ने पहनै सकै छेलां । हमरों पति कें

एक दाफी नगरपालिका में सरकारी नौकरियो मिली रहलौं छेलै, मतर हुनी नै जावै सकलै । सरदारें मना करी छेलै छेलै ।”

“मतरकि हीरा कें कैन्हें मारी देलौं गेले ?”

“हम्में खुद्दे नै जानै छी, तें की बतैयौं । परसू हुनी रोजानै नाँखी जंगल गेलौं छेलै । साँझो तांय नै लौटलै तें राते-रात हम्में थाना पहुँचलां । शाहिद बाबू दरोगा आरो हमरौं पति में अच्छा जान-पहचान छेलै । शाहिद बाबू लें, सरदार रौं संदेश हमरे पति लै कें जाय छेलै । हम्में जबें हुनका सें आपनौं पति के बारे में पूछलियै तें हुनी चौकी पड़लै । हमरा समझाय-बुझाय कें घोर भेजी देलकै । कल सँझकी बेरा हुनी हमरा लुग ऐलै आरो कहलकै, ‘हमरा बहुत्तें दुख छै कि हीरा कें कोय्यौं कुल्हाड़ी सें काटी छेलै छै । ओकरो लहास पोस्टमार्टम वास्तें गेलौं छै । कुछुवे देर में तोरा लहास मिली जैथौं ।’ ई सुनी कें तें हम्में वहीं ठां बेहोश होय गेलां । जबें होश ऐलौं तें लहास गाड़ी में रखलौं होलौं छेलै । शाहिद बाबू दू सिपाही साथें लहास लैकें हमरौं घोर ऐलौं छेलात आरो क्रिया-करम रौं सब्भे टा इन्तजामों हुनिये करलें छेलात । राते-रात हमरौं पति कें सारा पर जलैलौं गेलौं छेलै ।”

एतना कहतें-कहतें ऊ जनानी फूटी-फूटी कें कानें लागलै ।

“आबें अपना में ढाढ़स बांधलै सें निकको । हम्में जल्दिये कातिल रौं खात्मा करी देवै । हों, एक बात आरो, तोहें जे कुछ हमरा सें बतैलै छौ, ओकरो बारे में कहीं कुछ नै बतैवौ । शाहिद दरोगो सें ने ।”

जखनी जनानी आरो फैसल रौं बीच ई सम्वद चली रहलौं छेलै, तखनिये एकटा बुजुर्ग आदमी वै ठां आवी गेलै, जेकरौं पीछू दू आदमी चार कुर्सी लेलें होलें छेलै । बुजुर्ग नें फैसल दिश देखतें कहलकै, “आपनें सिनी बहुत देरी सें ठाड़ौं छियै । ला, कुर्सी पर बैठी कें बात करौं ।”

“जी धन्यवाद” फैसल ने हाथ जोड़तें ऊ बुजुर्ग आदमी कें कहलकै, “आबें हम्में चलवै । हीरा माँझी के बारे में जानै लें आवी

गेलों छेलियै । मजकि कोय खास बात मालूम नै हुए पारलै ।”

“हों, बेचारा शरीफ आदमी छेलै । मेहनत-मजदूरी करी आपनों आरो बीबी, बच्चा रों पेट पालै छेलै । नै जानों, कोन जालिमें ओकरों मूड़ी काटी लेलकै ।”

“अच्छा हम्में चलै छियै ।”

“नै, नै, हेनों नै हुए पारें । आपनें ई गरीब के कुटिया में चलियै आरो कम-से-कम चाय तें जरूरे ग्रहण करियै ।”

“चाय के आमंत्रण लेली धन्यवाद । इखनी हमरा कुछ जरूरी काम छै, ये लेली हम्में कभियो आवी कें पीवी लेवै ।”

“फेनू आवै के बाते पर हम्में छोड़ी रहलौ छियौं । होना कें हमरों नाम मौलाना बख्शी छेकै । याद रखवा ।”

“जरूर-जरूर चचा जान ।” ब्रेशा कहलकै ।

“जुग-जुग जिओं बेटी, सदा खुश रहों ।”

“देखलौ साहब, हिनका आशीर्वादो मिली गेलै ।” इन्सपेक्टर हँसते-हँसते बोललै ।

“भरलौं भीड़ में हम्में चचा जान भी तें कहलें छियै ।” ब्रेशा गाड़ी में बैठतें बोललै ।

“आवें कहाँ चलना छै ?” इन्सपेक्टर अंजनी शर्मा गाड़ी कें स्टार्ट करतें पूछलकै ।

“घरे चलौं । आइन्दा रों प्रोग्राम के बारे में सोचना छै ।”

“होना कें तोहें आपनों मनौं में जरूरे कोय प्रोग्राम बनाय लेलें होभौ ।” ब्रेशां विश्वास भरलौं आवाजों में कहलकै ।

“हों, दू बात दिमागों में छै । पहिलें शाहिद कें टटोललौं जाय या तें जंगल दिश रुख करना चाही ।”

“शाहिदे सें की मदद मिलें पारें ?” इन्सपेक्टरें पूछलकै ।

“मदद ई मिलतै कि वैं जंगल रों सरदार के बारे में बतैतै ।”

“ओकरा की पता ?”

ऊ सरदार रों आदमी छेकै । ओकरा सब्भे टा बात मालूम

छै । हीरा रों लहासों के बारे में ओकरा डाकुए दिश सें हिदायत मिललौं होतै कि शेरघाटी थाना में लहास आनलौं जाय आरो जल्दी-सें-जल्दी ओकरों क्रिया-करम करी देलौं जाय । यही कारण छेकै कि शाहिद नें रातो-रात आपनों खर्च पर लहास कें जलाय देलकै ।”

“मतर शाहिद.....?”

“मतर-अतर रों कोय गुंजाइश नै छै । आबें ई बात साफ होय गेलौं छै कि शाहिद नें पोस्टमार्टम रिपोर्ट दिवै सें आरो विस्तार में बताय सें कैन्हें इनकारी छेलैं छेलै । यहू बात छेकै कि ओकरों पीठ पर सरदार के हाथ छै, यही लें वैं तोरा सें होनों कठोर बोली में बात करलकै, आरो हमरौ अकड़ दिखैलकै । यहू एक बात के स्पष्टीकरण होय जाय छै कि पुलिसवाला शेरघाटी थाना आवै वास्तें पैरवी कैन्हें लगावै छै आरो टाका कैन्हें खर्च करै छै ।

“कैन्हें ?”

“यै लें कि सरदार ओकरा हर महीना एक अच्छा रकम दै छै ।”

“ओहो, तें ई बात छै ।” ब्रेशां एक ठण्डा साँस लेतें कहलकै । इन्सपेक्टरें गाड़ी रोकी देलकै । ऊ सब फैसल रों घर पहुँची चुकलौं छेलै ।

झायंग रूम में सोफा पर बैठतें इन्सपेक्टरें पूछलकै,“ हों, तें तोहें प्रोग्राम रों बारे में नै बतैलौ ।”

“एत्तें जल्दिये की छै, जरा सोचौ तें दा ।”

“अच्छा तें आबें हममें चलै छियौं, दू घण्टा बाद ऐवौं ।”

“तोहें कहाँ चललौ ?” ब्रेशां कुछ तेज आवाजों में पूछलकै ।

“ऊ, ऊ.....” इन्सपेक्टरें कुछ बेबसी सें ब्रेशा दिश देखलें छेलै ।

“साफ कैन्हें नी बोलै छौ कि भुखाय गेलौं छौ ।”

“जी हों, ठीक्के कहलौ ।” इन्सपेक्टरों के मुँहों सें हठाते निकललै ।

फैसल कें हँसी आवी गेलै । कहलकै, “बड़ी जालिम छों ब्रेशा । खैर, हममें खाना लगवाय छियौं । तोहें यही खाय लें इन्सपेक्टर साहब ।”

“धन्यवाद, मजकि हममें घरे जाय कें खैवै ।”

“घरों में की मिलतौं, यहाँ तें हारिल आरो तीतर पकलों होलों छै । साथे-साथ पुलावो ।”

पकलों सब खाना के नाम सुनी कें इन्सपेक्टर के ठोरों पर पानी चलै लागलै । वैं थूक रों घूँट कँठों के नीचें उतारतें बोललै, “मतर.....”

“कुछुओ नै” फैसल नें कहलकै,” ब्रेशा, जा आरो खाना निकलवावौं । तोरों हाथों के पकलों शिकार जों इन्सपेक्टर साहबें नै खेलकै तें हिन्हीं जिनगी भर पछलैता ।”

ई बात सें ब्रेशा कें सचमुच गुमान होय गेलै । ऊ अकड़तें होलें उठलै आरो वैठां सें भीतर चल्लों गेलै ।

खाना परोसलौं गेलै आरो दोनों खाना पर डटी गेलै । खानाहें के दौरान फैसल नें कहलकै, “शाहिद सें कुछ उगलवाय लैके मतलब छै कि ओकरा पर सख्ती करलौं जाय, जे संभव नै छै ।

“आबें रहलै जंगल रों बात, तें कल हममें जंगल देखै लें चलवै—शिकारी रों भेष में । हमरा वहाँ जैय्ये लें पड़तै, नै तें जंगल में घुसै के आरो कोय दूसरों कारण हममें पैदो ने करें पारौं । जंगल रों सरदार एकदम ज्योतिष बुझावै छै । एकरों गिरोह ढेरे आदमी के संगठन होतै । से ओकरा तक पहुँच बनैवों आसान नै होतै । नै जानौं, कतें कठिनाई सें गुजरै लें पड़ें । यै लेली चाहै छियै कि हममें अकेल्ले वै ठाँ जाँव ।”

“ई केना हुँ पारें । हमरौ सिनी तोरों साथ चलवै ।” एक्को क्षण बिना रूकले इन्सपेक्टर अंजनी बोली पड़लै ।

“आरो नै तें की, अकेला से तें कुछ साथे भला ।” ब्रेशा बोली पड़लै ।

“मतरकि तोरों वहाँ कोय कामे नै छै । तोहें यही रहो तें अच्छा ।” फैसल ने ब्रेशा ओर देखतें कहलकै ।

“नै, नै, हम्मों साथ चलवै । जंगल में जासूसी आय तक नै करलें छियै । ई दाफी एकरों तजुरबा होय जाय ।”

“फेनू कहियो तजुरबा होय जैतै । ई दाफी जंगल में खतरनाक लोगों सें वास्ता छै, यै लेली तोहें नै जैवा ।”

“तें की, खाली तोरे दोनों जैभौ ?”

“ई तें कलकों मुआइना के बादे मालूम हुएँ सकतै कि वहाँ कतें आदमी के जरूरत पड़तै ।”

“तबें तें हम्मू चलवै ।”

“मतर शिकार के परमिट लिएँ पड़तै । बिना इजाजत हम्मों शिकार कना करवै ।” इन्सपेक्टर ने फिक्रमन्द बोली में कहलकै ।

“ई हमरा पर छोड़ी दा ।” फैसल बोललै ।

“फेनू तें कल तांय लेली इजाजत दें ।” इन्सपेक्टरें इजाजत चाहलकै ।

“इजाजत छौं, मतर, जों कुच्छू खास बात मालूम होय जाँव, तें टेलीफोनोँ पर हमरा जरूरे सूचित करियोँ, आकि आपन्हें आवी जैवौ ।”

अब तांय ऊ सब खाना खाय चुकलौ छेलै । इन्सपेक्टर रों गेला के बाद ब्रेशा आपनों क्वार्टर चल्ली गेलै । आरो फैसल ढेर-ढेर चिन्ता में डूबी गेलै ।

अगला दिन सात बजे सें पहिलें इन्सपेक्टर अंजनी शर्मा साहब पहुँची गेलै । फेनू दानिशो आवी गेलै । ब्रेशा तें आरो पहिले

आवी चुकलों छेलै । चाय पीला के बाद सब्भे धन्वा-मन्वा के जंगल दिश रवाना होय गेलै ।

जंगल रों नगीच पहुँची कें फैसल नें गाड़ी रोकै देलकै । आरो फेनू सब पैदल चली पड़लै । सब्भे के हाथों में बंदूक छेलै, जबें कि ब्रेशा एयरगन लेलें होलें छेलै । भेषधारन सें तखनी सब शिकारिये लागी रहलें छेलै । बस फैसल के हाथों में बंदूक के जग्घा में रायफल छेलै ।

पूरब दिश सें चलतें होलें ऊ सब कुछ दूर तक चलथैं रहलै । फेनू एक जग्घा पर रूकी कें फैसल नें कहलकै, ” हीरा पूरबे दिश निगरानी रों काम करै छेलै । यहीं सें अभियो ई दिशा के निगरानी होतें होतै । ई दिशों सें जंगलो साफ छै आरो आसानी सें जंगल में दाखिल होय लें रास्ता बनलें होलें छै । जंगल बीच में जाय कें घन्नों होतें बुझावै छै । आरो पच्छिम दिश तें आरो घन्नों होय गेलें छै । यै लेली हमरा सिनी कें पच्छिम दिश ही चलना चाही । ”

एतना कहना भर छेलै कि सब पच्छिम दिश ही बढ़ी गेलै । जवें ऊ सब जंगल रों पच्छिम हिस्सा में पहुँचलै, तखनी दिन के बारह बजी रहलें छेलै । गाड़ी सें आवै में दू घण्टा लागलें छेलै ।

हिन्नें जंगल एकदम्में घन्नों छेलै, यहाँ तक कि भीतर तक जैवों मुश्किल होय रहलें छेलै । पहाड़ी के बगल सें नीचें-नीचें नदी बही रहलें छेलै । ऊ सब नदी के सीधे में दक्खिन दिश बढ़लै कि तखनिये एकाएक दानिश चिल्लाय पड़लै ।

दानिश के चिल्लाना छेलै कि सब्भे एक्के साथ होशियार होय उठलै । दानिश के आवाज पर चीतां घूमी कें ऊ सब के दिश देखलकै आरो ऊ छलांग मारतें जंगल में घुसी गेलै ।

“ई हिस्सा बड़्डी खतरनाक छै ।” इन्सपेक्टर शर्मा फुसफुसैलों आवाज में बोललै ।

“जंगल में खतरा सिनी के होना तें तैय्ये छै । एतनै नै, जंगली इन्सान तक खतरनाक होय छै । आबें यही जंगल में देखों, जंगल रों

सरदार तांय खतरनाक छै । हिन्ने चीताहौ खतरनाक बुझैय्ये रहलौ छीं ।
हम्मं तें फैसला करी लेलियै कि हिन्हें मचान लगाय कें चीता के शिकार
करवै ।”

“चीता रौ शिकार ।” दानिशें आचरज सें पूछलकै ।

“हों, आबें शिकार के इरादा करी लेलें छियै । यही दिशा सें
होलें एक मील अन्दर घुसी कें मचान बनैवै । चार मचान के जरूरत
पड़तै । एक पर हम्मं बैठवै, दूसरा पर इन्सपेक्टर, तेसरा पर दानिश,
आरो चौथो पर ऊ आदमी, जे हाँका लें बैठतै ।

“मजकि हमरा सिनी यहाँ शिकार खेलै लें नै ऐलौ छियै ।”
ब्रेशा बोललै ।

“शिकारो वहेँ काम रौ एक हिस्सा छेकै ।”

“ऊ केना ?”

“देखौं, देखौं, ऊ के आवी रहलौ छै ।”

दानिशें ऊ आदमी दिश सबके ध्यान दिलैलकै, जे जंगल सें
निकली कें ओकरे सिनी दिश बढ़लौ आवी रहलौ छेलै ।

ऊ आदमी के हाथों में रायफल छेलै । फैसल नें ऊ दिश देखी
कें मनो में निशान निश्चित करेँ लागलें, जहाँ सें निकली कें ऊ आदमी
ओकरो सिनी के दिश आवी रहलौ छेलै ।

फैसल आरनी सें चार कदम के दूरी पर रुकी कें ऊ आदमी
बोललै, “तोहें सब के छेकौ आरो यहाँ की करी रहलौ छौ ?”

“हम्मं शिकार खेलै लें ऐलौ छियै, मतर तोहें के छेकौ ?”
फैसल बोली पड़लै

“की तोरों पास शिकार खेलै के परमिट छीं । हम्मं फॉरेस्ट
गार्ड छेकियै । जंगल रौ निगरानी करै छीं ।”

“हों परमिट छै ।” आरो फैसल ने दूरहे सें परमिट दिखैतें
कहलकै ।

“ई इलाका बड़्डी खतरनाक छै । चीताहौ के भरमार छै ।
तोरा सिनी के यै ठां रहवौं ठीक नै ।”

“मजकि हम्में तें हिन्हें चीता रों शिकार खेले लें चाहै छियै ।”
बात करते-करते फ़ैसल ऊ आदमी के बेहद करीब पहुँची गेलों छेलै ।
परमिट ओकरो हाथे में छेलै । वैं ओकरा देखैवों शुरु करलकै । गार्डें
जैन्हें हाथ बढ़ाय कें परमिट लै लें चाहलकै, फ़ैसल नें ओकरो रायफल
झपटी लेलकै । गार्ड कें समझाओ में अभी में कुछओ नै ऐलों छेलै कि
फ़ैसल नें एक कसलों झापड़ ओकरो कनपट्टी पर जमाय देलकै,
साथे-साथ घुटना से ओकरो पेटों पर आक्रमण करलकै ।

ई सब एहें जल्दी से होलों छै कि केकरो कुछ समझ में नै ऐलै ।

“एकरा उठावों आरो गाड़ी तक लै चलों । “फ़ैसल नें
इन्सपेक्टर आरो दानिश से कहलकै ।

एक हाथ से कनपट्टी आरो दूसरो हाथ से पेट कें पकड़लें ऊ
आदमी अभी तांय दुहरा बनी चुकलों छेलै । इन्सपेक्टरें दोनों गोड़
आरो दानिशें दोनों हाथ पकड़ी कें ओकरा टांगी लेलकै आरो गाड़ी के
पिछुलका सीटों पर बिठाय देलकै । आरो फेनू आपन्हें बैठी रहलै ।
कुच्छू सोची कें दानिशें बन्दूक के रुख वहा आदमी दिश करी देलकै ।

फ़ैसल ड्रायविंग सीट पर बैठलों होलों छेलै आरो ब्रेशा ओकरो
दोसरो तरफ बैठली छेलै । आबें गाड़ी बड़ी तेजी से वापिस होय चललों
छेलै

कुछुवे देर बाद गार्ड संभली कें बैठी गेलै आरो बिगड़लों बोली
में बोललै, “तोरा सिनी बहुते खराब करलें छौ । हमरा मारलें-पीटलें
छौ, हमरो रायफल छीननें छौ आरो आबें हमरा अगुवा करी लेलें जाय
रहलों छौ । अभियो कहें छियों कि हमरा छोड़ी दा, नै तें एकरो अंजाम
बड्डी खराब होतौं, “जरा हम्मूं तें जानियै कि अंजाम बुरा के करतै ।”
फ़ैसल ने गाड़ी चलैतै-चलैतें पूछलकै ।

“हम्में आपनों अफसर से शिकायत करवै आरो तोरा सिनी के
खिलाफ केस करवों ।”

“तोरों अफसर के छेकों आरो हमरा सिनी के छेकियै, तोरा की
मालूम ।”

ई बात सुनते हैं ऊ आदमी चुप होय गेलै आरो दानिश के हाथ में तनलों बन्दूक के बड़ी गौर से देखे लागलै, जेना मौका मिलते हैं वैं झपटी लेतै ।

पीछू लगलों आइनानुमा शीशा में दानिशें हौ आदमी के नीयत के अन्दाजा लगाय लेनें छेलै; यही ले इन्सपेक्टरें से बोललै, “तहूँ होशियार रहों । ई आदमी पर ठीक-ठीक निगरानी रखों ।”

दानिश के बात सुनी इन्सपेक्टर शर्मा ने आपनों रिवाल्वर निकाली लेलकै आरो ऊ आदमी रों बगल से लगाय देलकै ।

आपनों घोर के ड्रायंग रूम में पहुँची के फैसल ने ऊ आदमी रों हाथ-गोड़ बान्ही देलकै आरो जमीनों पर लेटाय देलकै । फेनू अन्दर जाय के आपनों चाबुक ले आनलकै ।

इन्सपेक्टर, ब्रेशा आरो दानिश, ई सब कारवाई के खामोशी साथें देखी रहलों छेलै ।

“आबे बतावों कि तोरों नाम की छेकों ?” फैसल चाबुक के हाथो में संभालते बोललै ।

“वकरम ।”

“केकरो वास्ते काम करै छै ?”

“हमें सरकारी आदमी छेकियै ।”

“एकदम झूठ ।” फैसल ने ओकरो पेट पर चाबुक रसीद करते कहलकै ।

“तोहें हेना के मारै छै केन्हें ?” हौ आदमी बिलबिलैते होलों कहलकै ।

“तोहें सच-सच बतावों कि केकरा ले काम करै छै ।”

“हमें बताय देलियौं नी ।”

फैसल के रहलों नै गेलै । वैं दू-चार बार चाबुक रसीद करी देलकै । चाबुक के आवाज गूजी उठलै—सड़ाप, सड़ाप । फेनू आपनों हाथ रोकतके बोललै, “जल्दी बतावों ।”

एतने टा बोलै ले जेना फैसल ने हाथ रोकले छेलै आरो

फेनू—सड़ाप, सड़ाप, सड़ाप, सड़ाप ।

ई दाफी चाबुक ऊ आदमी रों अंग-अंग पर गिरलौं छेलै, जेकरा सें ऊ जमीन पर लेटना शुरू करी छेलैं छेलै ।

ब्रेशा आपनों आँखी पर अँगुली राखी लेलें छेलै ।

चाबुक कें रोकतें आरो आपनों हाथों सें ओकरा लपेटतें फैसल नें ऊ आदमी सें कठोर शब्दों में कहलकै, “तोहें की समझै छौ हमरा तोरों बारे में कुछ पता नै छै । तोरों काम जंगल रों पच्छिमी हिस्सा के निगरानी करवों छेकै । तोहें सरदार के आदमी छेकौ । तोरों पहुँच ऊ शीशम गाछ तांय छै, जेकरों तना सें रस्सी लटकै छै आरो ओकरों आगू तोरा कुछ नै मालूम ।”

वकरम नें आँख फाड़ी फैसल के दिश देखलकै । फेनू हाथ टेकी कें जमीन पर बैठे के कोशिश करतें बोललै, “तोरा सब पता छौं, सब कुछ जानै छौ, तबें हमरा मारी रहलौं छौ कैन्हें ?”

“आबें तोहें यही कहवौ । चलौं जल्दी-जल्दी तोहें आपनों बारे में विस्तार सें बतावों ।”

“पूछों, की पूछै छौं ।” ऊ आदमी हारलौं आवाज में बोललै ।

“तोहें सरदार के चंगुल में केना फसलौ ?”

“हम्में छोटों-मोटों चोरी करै छेलियै । एक दिन चोरी करी कें भागी रहलौं छेलियै कि हमरा एक ठो आदमी मिललै । वैं कहलकै कि हम्में ओकरों साथ चलौं, नै तें वै पुलिसों कें खबर करी देतै । हम्में ओकरों साथ यहाँ आवी गेलियै । आरो तभिये सें हम्में सरदार लेली काम करी रहलौं छियै ।

“तोहें कतें समय सें ओकरों लेली काम करी रहलौं छौ ?”

“ठौ महीना सें ज्यादा होय गेलौं छै ।”

“तोरों ड्यूटी की छेकौं ?”

“भोर आठ बजे सें लै कें सँझकी छौं बजे तांय जंगल रों रखवाली करवों ।

“ई काम लेली तोरा की तनखाह मिलै छौं ?”

“दू हजार रूपया महीना ।”

“ई रास्ता पर तें मोटरगाड़ियो कम चलै छै, फेनू तोहें कोन सवारी सें यहाँआवै आरो जाय छै ?”

“एक ऑटो रिक्सा हमरा लै जाय छै आरो पहुँचाय दै छै ।”

“यानी कि तोरों साथ आरो भी लोग छै, जेकरा तोहें जानै छै ?”

“जी हों, फैज छै आरो इन्शा भी छै ।”

“ई लोग कहाँ रहै छै ?”

“ई हमरा नै मालूम, कैन्हें कि बात करै के हमरा इजाजत नै छै । बस ऑटो रिक्सा के ड्रायवर के मुँहे सें हममें ऊ दोनों के नाम जानै छियै । ड्रायवर कभियो-कभियो नाम सें ऊ दोनों कें पुकारै छै ।”

“ई ऑटो रिक्सा की तोरा घरों सें लै जाय छै ?”

“नै, गांधी मैदान के पूरब दिश अमलतास गाछी के सामना ठीक साढ़े सामत बजें ऊ ऑटो रिक्सा आवी जाय छै । वहीं हमरा तीनों पहुँचै छियै । साढ़े सात सें पहिले वहाँ आवै सें हमरा सिनी कें मनाही छै । फेनू सँझकी वक्ती वही ठां हमरा सिनी कें पहुँचाय देलें जाय छै ।

“ऑटो रिक्सा के नम्बर की छेके ?”

“बी. एच. ए 197104”

“तोहें जंगल में आरो की कुछ देखलें छै ?”

“कुछुवा नै । हमरा आपनों काम सें ही मतलब राखै के हिदायत बार-बार देलें जाय छै ।

“ई हिदायत के दै छै ?”

“हमें नै कहें पारों कि ऊ के छेकै । हमरा सिनी ओकरा बस जंगल के सरदार के नामों से जानै छियै । जबें हमरा कोय खास हिदायत देलें जाय छै, तें आँखी पर कारों पट्टी बाँधी कें कोय तहखाना में लै जैलें जाय छै । ऊ तहखाना की छेकै, बस एक बड़ों घोर छेकै, जेकरों एक कमरा के दीवार सें आवाज ऐतें रहै छै । ऊ

हमरा सिनी के हिदायत दै छै आरो हमरा सिनी खाड़ों रहै छियै ।”

“तोहें ऊ तहखाना के बारे में कभियो पता लगावै के कोशिश नै करलै ?”

“कभियो नै । हममें कोशिश करतियै तें अब तांय जीत्तों नै होतियै । जे लोगों कें जे काम मिलै छै, ओकरा सें आगू कुछुवो करवों के सजाय सिरिफ

मौत होय छै ।”

“तें कोय्यों पुलिस कें कैन्हें नी खबर करलकै ?”

“पुलिस” पुलिस के नामे सुनतें वकरम हँसलै, “बड़का-बड़का पुलिस अफसर जंगल के सरदार सें भय खाय छै, फेनू वै पुलिसवाला के टाका दै कें गुलामो बनाय लै छै ।

“ई तोरा केना पता चललौं ?”

“ई शेरघाटी थाना छै नी, वहाँकरो दरोगा शाहिद सें हमरों जान-पहचान छै । ऊ हर महीना टाका लै लें आवै छै, आरो हममें आपनों निगरानी में ओकरा टाका दिलवावै छियै ।”

“शाहिद कें हर महीना टाका मिलै छै ?”

“वहाँ गिनी कें टाका नै देलौं जाय छै, बलुक बड़ों मुँह के घड़ा में टाका भरलौं रहै छै; वहीं सें टाका निकालै लें होय छै । दरोगा साहब लेली तीन मुट्ठी, जमादार साहब लेली दू मुट्ठी आरो सिपाही सिनी लेली एक्के मुट्ठी टाका निकालै लें होय छै । शाहिद साहबे ई टाका निकाली कें लै जाय छै । कैन्हें कि हुनकों सिवा केकरौ जंगल के भीतर जाय के इजाजत नै छै । ऊ थैला में सौ आरो पचास के टाका होय छै ।”

“ओहो.....” फैसल नें कुछ सोचतें कहलकै, “हीरा मांझियो, वही जंगल रों निगरानी के काम करै छेलै । ओकरा कैन्हें मारी देलौं गेलै ?”

“हममें कोय हीरा के नै जानै छियै, मजकि एत्तें मालूम छै कि कोय मारलौं गेलौं छै ।”

“केना पता चललै ?”

“बस संयोगे से समझौ कि पता चली गेलै । यहाँ सरदार के बारे में पता लगावै वाला के सजा ओकरो मूड़ी काटी के देलौ जाय छै ।”

“की पहिलौं हेन्हौं होलौं छै ?”

“हौं पहिलौं कै एक ठो लोगौं के मूड़ी काटलौं गेलौं छै ।”

“तोरा ई बात केना मालूम होलै ?”

“जबे हम्मै शुरु-शुरु में जंगल ऐलौं छेलियै, तँ अकरम नाम के एक आदमी जंगल रौं उत्तर दिश निगरानी करै छेलै । कभियो-कभियो हमरा दोनौं एक दूसरा से मिलियो लियै । अकरम ऊ सरदार के टोह में रहै छेलै । वहीँ हमरा बतैनें छेलै कि सरदार के आदमी मालगाड़ी लूटी लै छै । चलती गाड़ी से वै सिनी डब्बा अलग करी दै छै, आकि फेनू गाड़िये पर सवार होय के डब्बा तोड़ी, वै में घुसी जाय छै आरो माल गिरैते रहै छै । तबे यहाँ-वहाँ फैललौं आदमी माल के जंगल के अन्दर लै आनै छै । कार, स्कूटर, लोहा रौं सामान, यहाँ तक कि गल्ला तक ई लोग उतारी लै छै । अकरम नें हमरौ से कहलें छेलै, ऊ जग्घौं के पता लगावै लें, जैठां सरदार जंगल रौं भीतर रहै छै, या फेनू जहाँ कि सब्भे टा माल लै जैलौं जाय छै । मतर हम्मै इनकार करी छेलें छेलियै, कैन्हें कि अकरम नें हमरा बतैलें छेलै कि टोह लै वाला के मौत के घाट उतारी देलौं जाय छै । ओकरो गल्लौं काटी देलौं जाय छै । साथे-साथ ऊ कटलौं गल्ला के हमरा सिनी के देखैलौं जाय छै आरो धड़ फल्गू नद्दी में फेकवाय देलौं जाय छै । ई सब्भे टा बात हमरा अकरमे बतैलें छेलै । पिछला महीना एक दिन हमरा तहखाना लै जैलौं गेलै । वहाँ हम्मै अकरम के कटलौं गरदन लटकलौं देखलियै, तबे हम्मै समझी गेलियै कि ओकरो गर्दन कैन्हें काटलौं गेलौं छेलै । हीरा साथे यहाँ होलौं होते ।”

“मतरकि ओकरो धड़ तँ सड़क के किनारी में मिललौं छेलै ।”

“हमरा मालूम नै । एत्ते जरूर मालूम छै कि दू आदमी ई धड़

के बारे में हमरा से पूछी रहलौ छेलै कि एक बन्द बोरा में हममें कोय धड़ तें ने देखलें छियै ?”

“ऊ सब आदमी के छेलै ?”

“हमें केकरौ नै पहचानै छेलियै । बस एतनै कहें पारौं कि ऊ दोनों बड़ी परेशान छेलै । आबें बात समझै में आवै छै कि ऊ दोनों परेशान कैन्हें छेलै

“कैन्हें छेलै ?”

“लहास के फल्गू नदी में बहावै लें लै जैतें होतै आरो बोरा रास्ताहै में केन्हें के गाड़ी से गिरी गेलौ होतै । यही बात होतै ।”

“हो, ई बात हुए पारें ।” फैसल नें मूड़ी हिलैतें कहलकै ।

“मतरकि आबें हमरौ की होतै । तोहें हमरा यहाँ लै आनलौ छौ । ड्यूटी पर नै पावी के हमरौ तलाशी शुरु होय गेलौ होतै ।”

“एकरौ फिकिर तोहें नै करौ । अच्छा, आबें ई तें बतावौ कि तोहें रहै छौ कहाँ आरो तोरौ घरों में के-के लोग छौ ?”

“हमें मुरादाबाद मुहल्ला में रहै छियै । यहाँ अकेले छियै । एक कोठरी किराया पर लेलें होलौ छियै ।”

“एक बात सच-सच बतावौ—की तोहें आपनौ ई कामों से सन्तुष्ट छौ ?”

“नै हरगिज नै, हममें चोरी हेनौ घटिया काम जरूरे करै छेलां, ओकरौ कारण छेलै । हममें यहाँ नौकरी के खोजों में ऐलौ छेलियै, मतरकि जबें नौकरी नै मिललै आरो भुखले मरै के नौबत आवी गेलै, तबें हममें चोरी करे लागलें छेलां । मतरकि एकरौ मतलब है नै छेकै कि हमरौ जमीर मरी चुकलौ छै । जंगल रौ ई सरदार देश के कर्ते नुकसान करी रहलौ छै, ई तें हमरा से देखलौ नै जाय छै । हममें तें चाहै छियै कि सरदार मारलौ जाय, ताकि गाड़ी लूटै रौ सिलसिला बन्द हुए । हममें ई संबंध में तोरा जे कुछ बतैलें छियौ, ई सब हममें कभियो नै बतैतियौ, चाहे तोहें हमरौ खाले कैन्हें नी उधेड़ी देतियौ आकि जाने से कैन्हें नी मारी देतियौ । मतरकि जबें हममें जानी लेलियै कि तोहें

ओकरों बारे में बहुत कुछ जानी लेलें छै आरो तोहें दोसरो पुलिसवाला में सें नै छेकौ, जे सरदार के टाका पर पलै छै, तें हम्में यहाँ उचित समझलौं कि तोरा सब्भे कुछ सही-सही बताय दौं ।”

“धन्यवाद वकरम” फैसल ओकरों दिश बढ़लै आरो बैठी कें रस्सी खोलें लागलै । फेनू ब्रेशा के ध्यान खीचतें कहलकै, “ब्रेशा, फर्स्ट ऐड बॉक्स लै आनों, वकरम के घाव पर लगाना छै ।”

ब्रेशा दोसरो कोठरी सें फर्स्ट ऐड बॉक्स लै आनलकै ।

“वकरम, एक विचार हमरो मनो में ऐलो छै, केन्हेंनी तोहें जंगल वापिस लौटी जा । हम्में तोरा वैठां पहुँचाय दै छियौं । तोहें आपनों ड्युटी करना शुरु करी दौ ।”

“ऐकरा सें की होतै ?”

“कल आकि परसू हम्में जंगल पर चढ़ाय करवै । केन्हें कें शीशम के ऊ गाछ के आगू जैवै आरो तहखाना के रास्ता तलाश करै के कोशिश करवै ।”

“की तोहें वै में कामयाब होय जैवौ ?”

“नाकामी नाम के कोय शब्द हमरो डिक्शनरी में नै छै । हम्में आपनों जान के बाजी लगाय कें ऊ अपराधी सिनी के खत्म करै के संकल्प लै छियै ।”

“तबें तें ठीक छै, हम्मूओ तोरो साथ छियौं ।”

“तोहें कोशिश करौ कि ऊ सबके बारे में आरो कुछ विशेष जानकारी मिलें सकें, मतरकि सावधानी साथें । कल नै तें परसू हम्मू धावा बोली देवै ।”

“हम्में कोशिश करवै ।”

“धन्यवाद, आवो खाना खाय लें । खाना खैला के बाद हम्में तोरा वहाँ पहुँचाय ऐवौं ।”

“खाय-बाय के कुछ जरूरत नै छै । हमरा जल्दी-सें-जल्दी वही ठां पहुँचाय दें ।”

“ब्रेशा भोलू सें खाना लगाय लें कहौं ।”

जब ब्रेशा वैठां सें हटलै तें फैसल नें वकरम सें पूछलकै,” एक बात जब कोय ई घाव के बारे में पूछतौं, तब तोहें की कहभौ ?”

ई सुनी के वकरम खामोश होय गेलै ।

“सुनों, देहों परकों घाव तें दिखाय में नै आवै छै, खाली एक गाल पर हलका रं खरोंच छै, कही दियौ कि कोय झाड़ी सें खरोंच लागी गेलै ।”

“यहू कहें सकै छीं कि जंगली सूअर नें हमला बोली छेलै छेलै ।”

“हमरो ख्याल सें ई उचित नै होतै । झाड़िये वाला बात ठीक लागै छै ।”

एतन्हें में खाना आवी गेलों छेलै । दोनों खाना के मेज पर बैठी रहलै आरो सब्भे खामोशी सें खाना खैतें देखी रहलों छेलै । खाना खतम होलै आरो फैसल वकरम कें लै कें ओकरा जंगल पहुँचाय लें निकली गेलै ।

ब्रेशा, इन्सपेक्टर, दानिश वहीं ड्रायंग रूम में बैठलों रही गेलै ।

“भाय, कमाल होय गेलै । वकरम सें सब कुछ मालूमो होय गेलै आरो ऊ हमरो विश्वासो में आवी गेलै ।”

“ई सब फैसल साहब के सूझ-बूझ रों नतीजा छेकै इन्सपेक्टर साहब । तहूं आपना में ई गुण पैदा करों, आपनों आप में घुन नै लगावों ।”

“देखों ब्रेशा, हममें तोरा सें मुँह नै लगावै लें चाहै छियौं । तोहें हमरो पीछू कैन्हें लागली रहै छों ।”

“तोहें एत्तें कंजूस कैन्हें छों ?”

“हममें कंजूस छियै ?”

“आरो नै तें की । एत्तें साल सें जान-पहचान छै । कभियो तोहें भोज-भात देलौ ? कै दाफी सॉफ्टी आरो आइसक्रीमें लें कही चुकलों छियौं । आरो सब बारी तोहें वादो करी कें दारी छेलै छौ ।”

“हममें व्यस्त आदमी छी । भूली जाय छियै, चलौं अभिये खिलाय दै छियौं ।”

“आवें बाजार तांय के जाय । भोलुए कें भेजी मंगवाय लै छियै ।”

“यानि कि आय इन्सपेक्टर साहब सें खैय्यै के रहवौ ।” दानिश बोलतें-बोलतें हाँसें लागलै ।

“तें तोरों पेट में दरद कथी लें होय रहलौ छौं ।” इन्सपेक्टर शर्मा चिढ़ी कें बोललै ।

“यही लें कि सॉफ्टी तें हमरौ खाना छै ।”

दानिश के बात सुनी इन्सपेक्टर जबाब दै के बदला चुप होय गेलै

ब्रेशा आवाज दिँए लागलौ छेलै, “भोलू, भोलू ।”

भोलू जबें आवी गेलै, तें इन्सपेक्टरें पचास के टाका ब्रेशा के दिश बढ़ाय देलकै । ब्रेशा झट सें ओकरा लेलकै आरो भोलू दिश बढ़ैतें कहलकै, “ले भोलू, चार ठो सॉफ्टी लै आन, जरा जल्दिये ।”

“हम्में तें खाना खाय रहलौ छेलियै, आपनें रों आवाज सुनलियै तें बीचे में खाना छोड़ी कें आवी गेलियै ।” भोलू जबाब देलकै ।

ठीक छै, पहिलें खाना खाय ला, ओकरो बादे लै ऐय्यौ । टाका राखी ला ।” ब्रेशा टाका थमैतें बोललै ।

“मतरकि है चार सॉफ्टी....” इन्सपेक्टर आगू कहतें-कहतें रुकी गेलै ।

“एक हम्में, एक तोहें, एक दानिश आरो एक भोलू ।” ब्रेशां विस्तार सें समझाय देलकै ।

“हम्में सॉफ्टी नै खाय छियै ।” इन्सपेक्टर बोललै ।

“तबें तोरों हिस्सा हम्मीं खाय लेवै ।” ब्रेशां लगले उत्तर देलकै ।

“गला खराब होय जैथों । ई सॉफ्टी एक दाफी में नै खाना चाही ।”

“तोहें हमरों फिकिर नै करों । आपनों पचास टाका के मातम करना छौं, तें घोर जाय कें करियो ।”

“देखो, फेनू वहा रं के बात करना तोहें शुरु करी देलौ ।”
 “अच्छा छोड़ो, हमरो चुटकुला पर ध्यान दा ।” दानिशें बात के रुख बदलतें कहलकै ।
 “तोहें बहुते चुटकुला में सुनावै छौ ।” ब्रेशा टोकलकै ।
 “ई पत्रिका वाला हेन्हें चुटकुला छापै छै तें हममें की करौं ।
 “कोन ठो पुस्तक तोहें अध्ययन करै छौ ?”
 “ढोल बजै छै ढम्मक ढम, बुतरू के तुतरू, बाजै बीन बजावै तीन, एक छड़ी पर अंडा नाचै, तुत्तक मुत्तक ।”
 “ई सब तें बच्चा केरो किताब छेकै ।” इन्सपेक्टर हाँसें लागलै ।
 “ये में हाँसे के की बात छै । अभी तें हममें टीन एजर छियै, स्टूडेण्ट छेकियै ।
 “अच्छा चुटकुला की छेकै ?”
 “ई अंगिका लोक पत्रिका में छपलौ छै । मनगढ़न्त नै कही रहलौ छियौं
 “ई पत्रिका वहाँ से निकलै छै ?” इन्सपेक्टरें पूछलकै ।
 “लहेरिया सराय, दरभंगा से । त्रैमासिक छेके । ई पत्रिका रौं सम्पादक के नाम छेकै डॉ. सकलदेव शर्मा, आरो दाम—पच्चीस टाका”
 “बस, बस होय गेलै । हमरा पत्रिक रौं आगे वर्णन नै चाही ।
 चुटकुला सुनावौं” कि तभिये ब्रेशां बात के काटतें बोललै ।
 “तें सुनौं ।” दानिश ने गला साफ करतें कहना शुरु करलकै,
 “एक आदमी हर वक्ती सोचतें रहै कि ओकरो बीबी ओकरा से कहे कि वै नौकर केन्हें नी राखी लै छै । आखिर वै एक ठो नौकर रखलकै । नौकर ने पूछलकै कि ओकरो वास्ते काम की होतै, तें ऊ आदमी कहलकै कि तोरा सोचै लें पड़तौं । नौकरें पूछलकै कि तनखाह की होतै ? तें ऊ आदमी कहलकै, “पाँच हजार ।” ई सुनी के नौकरें फेनू पूछलकै, “आरो तारों की तनखाह छौं ?” तें ऊ आदमी कहलकै, “चार हजार ।” ई सुनी के नौकर बोललै, “तबे तोहें

हमरा पाँच हजार केना देभौ ?” तें ऊ आदमी कहलकै, “यहें सोचै रों बात छै ।”

“आखिर ई चुटकुला सुनावै के मकसद की छौं ?” इन्सपेक्टरें कुछ नै समझतें हुएँ पूछलकै ।

“चुटकुला सुनावै के कोय मकसदो होय छै की ?” दानिशें हैरत सें पूछलकै ।

मतरकि सोचैवाला चुटकुले कैन्हें सुनैलौं ?” ब्रेशाहीं टोकलकै ।

दानिश दू-एक पल सोचतें रहलै, फेनू बोललै, “सोचै के बात तें हमरा सिनी के बीच होना चाही । अभी तै होलौं छै कि कल चीता रों शिकार खेललौं जैतै, यानी एक किसिम सें धावा बोललौं जैतै । तहखाना तांय पहुँचै रों कोशिश करलौं जैतै । ओकरा सें पहिले मचान बैठै लें होतै । हमरो अभी डर मालूम होय रहलौं छै । हौ चीता के इलाका छेकै । सुनलें छियै, बलुक है कहौं कि कोय किताब में पढ़लें छियै कि चीता रों छलांग बड़्डी ऊँच्चों होय छै ।”

“अरे, तोहें एतें बुजदिल कहिया सें होय गेलौ ।” ब्रेशा हैरत में पूछलकै ।

“हम्में आदमी सें थोड़े डरै छियै । खाली जानवर सें, वहू में खूनी जानवर सें तें आरो डोर लागै छै ।”

“सच पूछौं तें चीता के शिकार खेलवौं खुद कें मौत रों मुँह में डालवौं छेकै ।” इन्सपेक्टरें कहलकै ।

“तोरा केना मालूम ?” ब्रेशां मजाक उडावै के अन्दाज में कहलकै ।

“तोहें तें कहवे करभौ, कैन्हें कि तोरौ तें घरों में रहना छौं । एक दाफी हम्में चीता रों मुँहों सें बची कें निकली गेलौं छेलां ।”

“ऊ केना कें ?” दानिशें पहलू बदलतें पूछलकै ।

“सुनों, शिकार पर गेलौं छेलियै ।”

“चीता रों शिकार पर यानी तहूँ शिकार खेलै छौ ।” ब्रेशां बड़ी गंभीरता सें पूछलकै ।

“कै साल होय गेलै । आखरी दाफी चीताहै के शिकार पर गेलों छेलियै । फेनू शिकार के नीयत सें कभियो जंगल नै गेलियै ।”

“एकरो मतलब होलै कि तोहें चीता के शिकार करी चुकलों छों ?

“एकदम ।”

“की तोहें विस्तार सें बतैभौ ?” दानिशें दिलचस्पी प्रकट करतें कहलकै ।

“बस समझों कि हम्में मौत के मुँहों सें बची गेलों छेलियै । अय्यो सोचै छियै तें रोआं खाड़ों होय जाय छै । चोरबत्ती के रोशनी में निशाना लगाय कें गोली चलैथें एक दहाड़ सुनाय पड़लों छेलै । कि हठाते गाछ के ठारी पर रस्सी के बनलों होलों पन्द्रह फिट के हमरों ऊँच्चों मचान, डाली के टूटथें जमीन पर आवी गेलै । हौ तें किस्मत अच्छा छेलै कि हाथ सें डबल बैरल के बन्दूक छूटी कें पत्थर सें जाय टकरैलै आरो गोली पत्ता सिनी कें चीरतें निकली गेलै आरो हौ ऊँचाई सें गिरलौ पर ओतें चोट नै लागलों छेलै । मचान टुटला के कारण रस्सी ई किसिम सें उलझी गेलों छेलै कि ऊ बीचे में लटकतें रहलै आरो हम्में झूलतें, जमीन पर आवी गेलां, जेना झूला रों पेंग भरलें रहों आरो बीचे में रस्सी किनारा करी लेलें रहें । मतरकि वै वक्ती चोट-बोट के होशे कहाँ छेलै । जान बचाय रों फिकिर छेलै । फेनू घायल चीता कखनियो हमला करे सके छेलै । मजकि अगला पन्द्रह मिनिट तांय कुच्छू हलचल नै होलै । रात आधों चाँद रों छेलै । जंगल एतै घन्नों छेलै कि चाँदनी नीचें तांय नै पहुँचें सके छेलै । कुच्छू देर तांय साँस रोकलें रहलों । फेनू आपना कें संभाललां । घुटना आरो टखना रों चमड़ी छिली गेलों छेलै । पतलूनो बड़ी बेढंग तरीका सें फाटी गेलों छेलै, मजकि देह के आरो सब हिस्सा सही-सलामत छेलै ।

“बन्दूक रों पता नै छेलै । नै चोरबत्तिये जलाय कें गाँव दिश जावें सके छेलां । जेना-तेना आपना कें संभाललां आरो एक गाछी पर चढ़ी गेलां । शिकार में हमेशा एक सें दू होवों अच्छा होय छै । मतरकि

है दिन हममें असकल्ले आवी गेलों छेलियै । पिछुलका कै महीना सें ई चीता लोगों कें परेशान करी रहलें छेलै । गाँव के मवेशी आरनी के सफाया तें करवे करै, आबें ऊ एत्तें दिलेर होय चुकलें छेलै कि राह चलतें आदमियों कें जख्मी करवों शुरु करी देलें छेलै । तीन जख्मी तें ऊ समय अस्पताल में पड़लें-पड़लें ओकरा कोसबो करी रहलें छेलै । गाँववाला कलक्टर कें रिपोर्ट छेलें छेलै आरो हमरा ऊ चीता कें खतम करै के हुकुम मिललें छेलै । हममें आरो हमरों साथी दिनेश बाबा दोनों चली पड़लां ।

“गरमी रों दिन छेलै । एक-दू स्थानियो शिकारी कें साथ लैके बात छेलै, मजकि है नै हुएँ पारलै । ऊ गाँव-शहर सें चालीस मील दूर छेलै । हमरा सिनी जीप सें तीन बजें रवाना होलियै आरो रास्ता में रुकतें हुएँ पाँच बजें तांय ऊ गाँव में पहुँचलां, जै ठां सें गाड़ी आगू नै जावें सकै छेलै ।

“जीप ग्रामपंचायत कें सुपुर्द करला के बाद हमरा सिनी कें तीन मील तांय पहाड़ी पगडण्डी पर चढ़तें-उतरतें काफी देर लागी गेलै, आरो जबें गाँव में दाखिल होलां, तें सूरज छुपै के तैयारी करी चुकलें छेलै । सफर रों थकान के चिन्ता छोड़ी कें हममें शिकार के बारे में ढेर सिनी जानकारी लेलियै आरो पहाड़ी कें सुखलें नद्दी के किनारा फैललें जंगल में घुसी गेलियै । गाँववाला हमरा ऊ सब जग्घों दिखलैलकै, जहाँ-जहाँ चीता शिकार करलें छेलै । हममें नद्दी रों हिस्साओ दिखलियै, जै ठां आगू चट्टान होला के कारणें पानी इकट्ठा होय रहलें छेलै आरो जहाँ शेर, चीता साथें आरो जंगली जानवर जरूरे पानी पीयै लें ऐतें होतै । हमरा सिनी बहुते कोशिश करलियै कि चीता रों पंजा के निशान मिलें, आकि कोय ताजा मारलें, आकि आधों खैलें शिकार मिलें, मजकि ऊ दिन हमरा आरो कुछ ज्यादा मालूम नै हुएँ पारलै आरो हमरा सिनी आपनों काम दूसरों दिन लें छोड़ी कें गाँव लौटी एलियै । दूसरों दिन भोरकवा उगै सें पहिलें हमरा दोनों बन्दूक लेलें जंगल दिश चली पड़लां । ऊ दिन हममें एक मिन्टो बर्बाद नैं करै

लें चाहै देलियै । कैन्हें कि शिकारी आरो जवारी के बस एक्के दाव बैठै छै । या तें बाजी मात या फेनू हार । एक दाफी हाथ सें शिकार निकली गेलौं, तें फेनू ओकरो कुछुओ भरोसों नै ।

“सूरज के दू बाँस चढ़ी ऐवों तांय हम्में जंगल में भटकहैं रहलियै, मतरकि एकरों अन्दाजा जरूरे होय गेलै कि आइन्दा हमरा की करना चाही । चीता कें घेरै वास्तें हम्में चार ठहराव तय करलियै, जे एक दूसरा सें मील या डेढ़ मील सें ज्यादा दूरी पर नै छेलै ।

“गाँववाला कें राजी करी हम्में चार बकरा मंगवलियै आरो तीने बजें सें ऊ बकरा सिनी कें निश्चित जगहों पर बंधवाय देलियै । हमरों योजना ई छेलै कि दू जग्घा पर दू आदमी गाछी पर बैठाय देलौं जाय, ताकि वै बकरा पर निगाह रखें । जैन्हें कें चीता बकरा पर हमला करै, ऊ सिनी हो हल्ला करी कें चीता कें भगाय दै आरो मौका पैहें शिकारी वै ठां पहुँची जाय, फेनू चीता के लौटला पर शिकार करी लै ।

“चीता रों लौटवों निश्चित छेलै, कैन्हें कि वै आपनों शिकार करलौं जानवर कें बादे में खाय छै । बाकी दू जग्घों वास्तें ई योजना बनैलियै कि रस्सी के मचान बनाय कें हम्में बैठौं आरो जों चीता आवी जाय छै, तें शिकार करी लौं ।

“अगला दिन, हठाते दिल में ई चाहत उभरलै कि चलौं हम्में असकल्ले कैन्हें नी ऊ चीता के शिकार करियै । मतरकि मजबूरी ई छेलै कि दिनेश बाबा साथें छेलै । तहियो हम्में हुनका हेनों जग्घों में बैठाय देलियै, जैठां चीता के आवै के एकदम्में सें कम उम्मीद छेलै । एतनै नै, हम्में चार जग्घों पर दू-तीन चक्करो लगेलियै कि चीता बकरा तांय पहुँचलै आकि नै, मतरकि सूरज डूबै तांय ऊ नै ऐलै । आखिर में हमरा सिनी दू रात जंगले में गुजारै के योजना बनैलियै । रात भरी जागवों जरूरी छेलै, यै लेली हम्में कुछ बिस्कट खाय कें आरो गरम-गरम चाय्ये पीवी कें संतोष करी लेलां । हौले-हौले सन्नाटा फैली गेलै । रात के काफिला आहिस्ता-आहिस्ता आगू बढ़े लागलै आरो हमरा हेनों महसूस हुएँ लागलें कि जेना रातो चौकन्ना होय गेलों रहें । हम्में

इन्तजार करते रहलियै, मतरकि आधो रात तांय चीता हमरों बकरा के नगीच नै ऐलै ।

“जे दू गाछ पर आरो लोग सिनी बैठलॉ छेलै, वहाँ चीता चक्कर काटी चुकलॉ छेलै आरो बकरा तक पहुँचै सें पहिलें भगाय देलॉ गेलॉ छेलै । ठीक आधों रात के वक्त चीता हमरों दिश बढ़लै आरो बकरा पर हमला करी देलकै । ऊ रस्सी तोड़ी कें ओकरा मुँह में लेन्हें भागी जाय के कोशिश करे लागलै । ठीक वही वक्ती हममें चोरबत्ती के रोशनी में निशाना लगाय देलियै । दहाड़ सुनाय पड़लॉ छेलै । हमरा दोसरों फायर करै के मौकाहै नैं मिललै ।

“एकदम भोरे भोर सब घटनास्थल पर पहुँची गेलै । गाँव में नै जानों केना खबर फैली गेलॉ छेलै कि हममें चीता रों लपेट में आवी गेलॉ छियै । आरो खुब्बे जख्मी होय गेलॉ छियै । पचासो लोग हमरा देखे लें दौड़ी पड़लै । दिनेश बाबा हमरों मुँहों में होमियोपैथी वाला दू बूंदे छेलें छेलै आरो छोटों-मोटों जख्मों पर पट्टियो बांधी छेलें छेलै । तबें हममें अगला मुहिम वास्ते तैयार होय गेलॉ छेलियै ।

“गाँववाला कें वहीं ठहराय लेलें छेलियै । सबसे पहिलें हममें आपनों बन्दूक संभालियै । चोरबत्ती के शीशा टूटी कें बिखरी गेलॉ छेलै, मजकि बन्दूक सही-सलामत छेलै । बकरा मरलॉ पड़लॉ छेलै । चीता रों निशान बताय रहलॉ छेलै कि गोली लगहैं ऊ जमीन पर गिरलॉ छेलै । जॉन जग्घा पर ऊ गिरलॉ छेलै, वैठां खून रों धब्बा छेलै । एकरों मतलब ई छेलै कि हमरों गोली ओकरा लागलॉ छेलै जरूरे, मतरकि है नै कहलॉ जावें सकें कि कत्तें जख्मी होलॉ छेलै । जे भी हुएँ, आबें ओकरा खोजी निकालना बहुत्ते जरूरी छेलै । कैन्हें कि जख्मी जानवर कोय्यो जानवर के तुलना में ज्यादा खतरनाक साबित होय छै । फेनू ऊ तें जंगली चीता छेलै, जे आय नै कल गाँव वाला सें जरूरे बदला लेतियै ।”

“बीबी जी सॉफ्टी” कि तखनिये भोलू अन्दर ऐतें बोललै ।

“लान, लान, आहा !” ब्रेशा सॉफ्टी खैतें बोललै,

“आबे इन्सपेक्टर साहब के कहानी सुनै में आरो मजा ऐतै ।
....भोलू, ई बचलौं होलौं हमरै दै दा । इन्सपेक्टर साहब नै खैतात ।”

इन्सपेक्टर साहब ठोरों पर जी फेरी कें रही गेलै ।

“हों, इन्सपेक्टर साहब, तबे की होलै ?” दानिश सॉफ्टी कें दाँतों से काटतें इन्सपेक्टर शम्प दिश देखें लागलै ।

“हम्मू सॉफ्टी खैवै ।” इन्सपेक्टर ब्रेशा से बोललै ।

“आबे तें हम्में दै से रहलियों । तोहें पहिले इन्कार करी चुकलौं छौं ।”

“तोरा दोनों कें खैतें देखी हमरा अच्छा नै लगी रहलौं छौं ।
ई कोय बात भेलै कि तोरा दोनों सॉफ्टी खा आरो हम्में बैठलौं रहौं ।”

“तोरा बैठे लें के कहलें छौं । तोहें आपनों शिकार के कहानी सुनैतें रहौं ।”

“सुनों, सॉफ्टी दा, पहिलें खाय लौं, तबे सुनैवौं ।” इन्सपेक्टरें सॉफ्टी दिश हाथ बढ़ैतें कहलकै ।

“हूँ, हूँ” ब्रेशां हाथ पीछू करतें कहलकै, “जों तोरा खानाहें छौं,
तें आपनों मंगाय ला । हमें भोलू कें बोलाय दै छियौं ।”

“नै, यही दै दा, हम्में फेनू बाद में मंगवैवौं, तबे सब मिली कें खैवै ।

“वादा ।”

“बिल्कुल वादा ।”

“दानिश तोहें गवाह रहियौं ।” ब्रेशां इन्सपेक्टर शर्मा दिश सॉफ्टी बढ़ैतें कहलकै ।

“हों, तें कहानी रों बकिया हिस्सा ?” दानिशें इन्सपेक्टरें से कहलकै ।

“हों, तें हम्में कही रहलौं छेलियों कि जखमी जानवर आरो खतरनाक होय छै; यही लें हम्में ऊ जखमी चीता कें छोड़ी देवों मुनासिब नै बुझलियै । पहलें तें हम्में ई पता लगैवौं जरूरी बुझलियै कि चीता गेलों छै कौन दिश आरो कहाँ तांय गेलों छै ? एकरों वास्ते हम्में

लहू आरो ओकरो पंजा रों निशान के खोज करलियै । बकरा सें लगभग दू-तीन फर्लांग के दूरी तक हमरा खून के बूँद सिनी नजर ऐतें रहलै, ओकरो बाद चीता नद्दी में उतरी गेलों छेलै । वहाँसे निकली के ऊ पहाड़ी के कोय जग्घा में जाय बैठलों छेलै । दू-तीन मील के घेरा रों पहाड़ी के चक्कर मारी हममें ई अन्दाजा लगैलियै कि चीता पहाड़ी छोड़ी के कन्हें नै गेलों छै, कन्हें कि हमरा ओकरो पंजा रों निशान आकि खून रों धब्बा आगू काहूँ नै मिललों छेलै । यही लें ई तय छेलै कि ऊ यहाँ पहाड़ी के कोय झाड़ी में छुपी के बैठलों छै । ओकरा बाहर निकालै लेली हाँक लगवाना जरूरी छेलै । जखमी शेर आकि चीता के दूढ़े वास्ते हाथी सें हाँका लगवैवों अच्छा रहै छै । मतरकि हमरो वास्ते ई संभवे नै छेलै । से पैदले हाँका लगाय के खतरा मोल लै लें लागलै । पहाड़ी गाछ पर हममें नगीचे-नगीच आदमी बैठाय देलियै आरो कही देलियै कि जेन्हें चीता घेरा तोड़ी के जावें लगै, तें वैं सिनी हो हल्ला करी के ओकरा हमरो दिश लौटै लें मजबूर करी दै ।

“दिनेश बाबा पहाड़ी के ऊपर पगडण्डी के सहारा सें चढ़ी गेलै, जैठां सें डेढ़ सौ गज के दूरी तांय हुनी चारो तरफ देखें सकें छेलै । ऊ वक्ती हममें गाछी पर नै चढ़ें सकै छेलियै, यही लें हमरा हाँका वालाहै साथें रहै लें पड़लै । आधों वक्त हममें चाँदे नाँखी दायरा बनाय के पहाड़ी के घेरी लेलियै, शोर करतें, मोटाश के गोली छोड़तें, झाड़ी सिनी के पीटे लागलियै । हमरा सिनी पहाड़ी के एकदम पीछू सें ऊपर चढ़वों शुरु करलें छेलियै आरो आधों सें अधिक पहाड़ी पार करी चुकलों छेलियै ।

“हाँका में जंगली मुर्ग, तीतर, खरगोश आरनी निकली-निकली के भागना शुरु करलकै, मजकि नुकैलों होलों चीता कहूँ नै दिखाय पड़लै । एक लकड़बग्घों मिललै, जेकरा देखतैं दिनेश बाबा गोली चलाय के मारी देलके ।

“पहाड़ी के मुन्हां पर पहुँची के हमरा सिनी थोड़ों सुस्तावै लें बैठी गेलियै । यहाँ सें देखला पर अन्दाजा होलै कि पहाड़ी के दायों

दिश ढलान, नदी के पार करी दूसरों दिश घन्नों जंगल से जाय मिललौं छेलै । जों चीता नद्दी पार करी एक दाफी ऊ घन्नों जंगल में जाय घुसलै, तें हमरों सब करलौं करैलौं चौपट होय जैतै । हममें मन-मन सोचलें छेलियै ।

“हमें महसूस करी रहलौं छेलियै कि चीता ये ठां में हाँका तोड़ी के निकलै के कोशिश जरूरे करतै आरो हमरों कोशिश ई छेलै कि घेरी-घारी के खुल्ला मैदान में दिनेश बाबा दिश करियै, जै से कि ओकरा आसानी से निशाना पर लेलौं जावें सकें । फेनू, नै जानौं की सोची के हममें आपनों पोजीशन बदली लेलियै आरो पहाड़ी के दायाँ दिश वाला टोली के साथ होय गेलियै—जन्नें ऊ जंगल पड़े छेलै ।

“हमें फेनू तेजी से हाँका शुरु करी देलियै । सौंसे जंगल हो-हो आरो पटाखा के आवाज से गूजी उठलै । कि हठाते पहाड़ी रौं आयौं दिश, गाछी पर चढ़लौं आदमी कपड़ा हिलाय-हिलाय के खबर देलकै कि चीता आपनों जग्घा से उठी के रवाना होय चललौं छै । तबे की छेलै, हममें तुरत होशियार होय गेलियै । बायाँ तरफ यहाँ-वहाँ से चीता के भगावै रौं आवाज आवें लागलौं छेलै । चीता रुकतें, थमतें आरो टोह लेतें हौले-हौले आगू बढ़ी रहलौं छेलै । जहाँ भी रुकै के कोशिश करै, गाछी पर चढ़लौं लोग ओकरा भगाय दै । आहिस्ता-आहिस्ता ऊ पहाड़ी के नीचे दिनेश बाबा दिश बढ़ना शुरु करलकै ।

“जबे चीता दिनेश बाबा के गाछी से दू सौ गज दूरी तांय पहुँची चुकलै आरो वहाँ उठलौं होलौं एक चट्टान के ओट में ठाड़ो होय के ई अन्दाजा लगाय के कोशिश करी रहलौं छेलै कि कन्नें जाँव ? कि तभिये वै देखतै-देखतै बिजली के गति से छलांग लगाय देलकै आरो ऊ दोड़ें लगलै । ओकरों रुख घन्नों जंगल दिश छेलै । ई सब एते तेजी से होलै कि दिनेश बाबा के गोली चलावें के मौकाहै नै मिललै । हाँका के कारण पहिले ऊ विपरीत दिशा दिश जाय रहलौं छेलै । मतरकि आबे ऊ जंगल ले दौड़ी रहलौं छेलै । एक तरह से बिजली के तेजी से हमरों दिश आवी रहलौं छेलै । खुशकिस्मती से हौ

तरफ चढ़ाय छेलै, ये लेली संभलै के हमरा मौका मिली गेलै । मुश्किल सें डेढ़ मिनट गुजरलौं होतै कि हम्मैं आरो चीता आमना-सामना आवी गेलियै । दोनों के दूरी बस लगभग दस गज रहलौं होतै ।

“चीता रुकी गेलै आरो ओकरो चमकतें, आगिन बरसैतें आँख हमरै पर टिकी गेलै । वै चाहै छेलै कि हम्मैं ओकरो रास्ता सें हटी जाँव आरो हम्मैं ई इन्तजारी में छेलियै कि चीता जो कन्नी काटी कें निकलें, तें गोली चलावौं । मतरकि हमरा दोनों के ई ख्वाइश पूरा नै हुएँ पारलै । चीता एक दाफी गुरैलै आरो वै हमरो ऊपर छलांग लगाय देलकै । हम्मैं तें पहिलें सें तैयार छेलियै । ओकरो छलांग लगैथें हम्मैं लबली दबाय देलियै । गोली ओकरो पीठी में लागलै आरो ऊ गिरी पड़लै । तभियो ओकरो छलांग एत्तें-एत्तें लम्बा आरो तेज छेलै कि ऊ हमरे नगीच आवी कें गिरलै । हम्मैं तेजी सें पाँच-छौं गज पीछू हटी गेलियै आरो बन्दूक सीधा करी लेलां ।

“मतरकि एतन्हें देर काफी छेलै । चीता एक दाफी उछललै आरो ओकरो दोनों अगुलका पंजा हमरो देह पर जमी गेलै । आगिन के एक लहर यहाँ सें लै कें वहाँ तांय दौड़ी गेलै । हमरा मुर्छा रं हुएँ लागलै । मतरकि है के नै जानै छै कि जिन्दगी केकरा नै प्यारो होय छै । जान बचावै के फिकिर नें हमरो होश दुरुस्त करी राखलें छेलै आरो हम्मैं ओकरो खुल्ला जबड़ा में, जे हमरो गर्दन दिश बढत्री रहलौं छेलै, बन्दूक के कुन्दा ठूसें लागलियै । मतरकि वहू पीछू हटै आकि पंजा छुड़ाय के बदला बन्दूक के कुन्दा मुँह में दबाय कें चबावें लागलै । एकरा सें ई होले कि ओकरो पंजा हमरो बदन पर ढीला पडें लागलै । एकरा अच्छा मौका समझी कें हम्मैं आपनो पूरा कुव्वत सें ओकरा पीछू धकेली देलियै ।

“ऊ पीछू गिरलै आरो बन्दूको ओकरो मुँहो सें छूटी गेलै । हम्मैं जल्दी सें बन्दूक संभालियै, मतरकि एतन्हें देरी में चीता फेनू छलांग लगाय लें आपनो देह समेटें लागलौं छेलै । हम्मैं बिना निशाना लेले लगली दबाय देलियै । एकरा संयोग कहौं कि गोली ओकरो

खोपड़ी तोड़ते हुए निकली गेली । चीता दू-तीन फीट जमीन से उछललै, फेनू वहीं ठां ढेर होय गेलै । गोली के आवाज पर दिनेश बाबा साथें आरो लोग सिनी गाछी पर से उतरी के वही दिश दौड़ी पड़लै । ऊ वक्ती हमरा एक दाफी फेनू मुर्छा आवें लागलें छेलै ।”

“वाह, वाह, यानी तहूँ चीता के शिकार करी चुकलें छौ ?” दानिशें इन्सपेक्टर शर्मा रों तारिफ करतें कहलकै ।

“मतरकि हमरा तें विश्वासे नै होय छौं ।” ब्रेशा बोललै ।

“कौन बातों पर ?” इन्सपेक्टरें चौकी के पूछलकै ।

“यही कि शिकार के ई घटना तोरों साथ गुजरलें छौं । हमरा तें यही बुझावै छै कि तोहें कहीं कोय घटना पढ़लें होभौ, जेकरहै तोहें हमरा सिनी के बताय देलौ ।”

“हमें तोरा से उलझै लें नै चाहै छी आरो नै तें आपनों बात के सच्चाई में कुछवो कहै लें ही चाहै छी । मतरकि एतना जरूरे कहै लें चाहभौं कि दिनेश बाबा अभियो भागलपुरे में रही रहलें छै, पाँच से लै के सात बजे शाम तक चित्रशालाहे में बैठलें रहै छै, तोहें जाय के पूछी लिए पारै छौं ।”

“अरे भाय, कौन बातों लें पूछा-पूछी के बात उठी रहलें छै” कि तखनिये फैसल आदर ऐतें हुए बोललै ।

“बात ई छेके कि इन्सपेक्टर साहब चीता रों शिकार के एक खिस्सा सुनाय रहलें छेलै । कहै के अन्दाज तें बढ़ियां छेलै, मजकि हौ खिस्सा के हिनी आपना से जोड़ी के बताय रहलें छै, दिक्कत यही छै ।” ब्रेशा बोली पड़लै ।

“हमें समझी गेलियै । ऊ घटना सच छेके । इन्सपेक्टर साहब बेशक चीता के शिकार करी चुकलें छै, ब्रेशा, तोहें हिनका बहुत तंग करै छौं ।”

“देखौ नी, हममें सॉफ्टियो खिलैने छियै, तभियो हमरा तंग करै छै ।”

“सॉफ्टी खैला के बादो तंग करी रहलौ छै । चू, चू, गलत बात

छेकै ।”

“अभी बाकी छै । हिन्ही आपन्हों खेलै छै, मजकि है वादा रों साथें कि बादाहौ में हिनी सॉफ्टी खिलैतै ।”

“हम्में वादा सें कहाँ हटी रहलौ छियै ।”इन्सपेक्टर शर्मा मुस्कैतें हुएँ बोललै ।

“तबें तें ठीक छै ।” ब्रेशो मुस्कैतें बोललै ।

“हों तें की योजना बनलै । शिकार पर कबें चलना छै ।” इन्सपेक्टरें फैसल सें पूछलकै ।

“आबें शिकार के योजना खत्म करी छेलैं छियै । वकरम विश्वास में आवी गेलों छै, यै लें पच्छिम दिश सें जंगल में दाखिल होय के मसला हल होय जैतै । हम्में यै लेली शिकार के योजना बनाय रहलौ छेलियै ताकि वही बहाना पच्छिम दिश सें जंगल में दाखिल हुएँ सकौं । वकरम नें वादा करलें छै कि वै हमरा हिफाजत में ऊ शीशम गाछी तांय लै जैतै, जैकरों ठाहरु सें रस्सी लटकलौं होलौं छै ।”

“की, पश्चिम दिशा सें लै जैतै ?” दानिशें पूछलकै ।

“नै, पच्छिम के बीच सें होय कें अन्दर जाय के इजाजत तें वकरमो कें नै छै । पच्छिम-उत्तर के किनारा सें पूरब होय कें वै हमरा अन्दर लै जैतै । ऊ गाछ के आगू पच्छिम तरफें घन्नों जंगल छै आरो हमारों ख्याल में वही तहखानो छेकै, कैन्हेंकि मालगाड़ी लूटला के बाद माल वहीं लै जैलौं जाय छै, आरो केकरौ ऊ दिश जाय के इजाजत नै छै ।”

“तें, हौ गाछ तक जाय कें की करवै ? फेनू गाछ तांय जैवों, आपना कें खतरा में डालै कें बरोबर होतै ।”

“ओकरों बाद के खाका हमारों दिमागों में छै । हम्में जंगल सें लौटै वक्ती ओकरा रूप छेलैं छियै । वकरम सें यहू मालूम होलौं छै कि ऊ गाछ के दक्खिन दिशा, लगभग एक मील के दूरी पर, विभाग रों डाकबंगला छै, जहाँ वनविभाग के अधिकारी ज्यादातर मौजूद रहै छै ।”

“वनविभाग के अधिकारी सें की लेना-देना छै ?” इन्सपेक्टर

शर्मा पूछलकै ।

“हम्मं ओकरौ चेक करै लें चाहै छियै, कैन्हेकि जंगल में होय रहलौ घटना सिनी के बारे में ओकरौ जानकारी जरूरे होतै । एक मील के दूरी कोय खास बात नै होलै ।

“हों, ई तें छै, मजकि तोरौ दिमाग में कौन खाका छौं, जेकरा पर अमल करवौ ।” दानिश नें चिन्ताग्रस्त आवाज में पूछलकै ।

“हम्मं डिस्ट्रिक्ट मजिस्ट्रेट, डी. आई. जी आरो एस. डी. ओ. लुग भी एक घण्टा रौ बाद जैवै; हुनका सिनी सें दू दर्जन हथियार बन्द पुलिसो माँगवै । ऊ सब कें तोहें आरो इन्सपेक्टर साहब आपनों निगरानी में लै कें जंगल के भीतर जैवौ । वकरम पच्छिम तरफों के रास्ता कें दिखैतौं । हम्मं डी. एम आरो एस. डी. ओ. साथें पूरब तरफों सें अन्दर जैवै आरो शीशम गाछ तांय पहुँचै के कोशिश करवै । हमरा सिनी हथियार सें लैस होवै । दू-चार पुलिस के नौजवान हमरो साथ होतै ।”

“मजकि जंगल रौ सरदार के आदमी तोरा शीशम गाछ के आगू बढै लें नै देखौं ।”

“हमरौ दिमाग में जे खाका छै, वही पर अमल करवै, यही लें सच्चाई कल्हे तोरा सिनी कें मालूम होतौं ।”

“कल कौन वक्ती यहाँ सें रवानगी होतै ।” ब्रेशां पूछलकै ।

“भोरे आठ बजें, ताकि दस बजें तांय हमरा सिनी हमला बोलें सकभौं ।”

“डी. एम जाय लेली मानी जैहौं ।”

“हों, अभी जंगल सें लौटला रौ बाद हम्मं डी. एम कें फोन करलें छेलियै, हुनको कहलै पर हम्मं एस. डी. ओ, आरो डी. आई. जी कें हुनको बंगला पर पहुँचै लें सूचना दै छेलै छियै । डी. आई. जियो हर तरीका सें मदद वास्तें तैयार छै ।”

“अभी तोरा कौन वक्ती जाना छै ?”

“सात बजें ।”

“अरे सवा छों तें बजी चललै । तोहें जल्दी-जल्दी मुँह-हाथ धोय ला ।”

“हम्में चलै छियौं ।” इन्सपेक्टर शर्मा आरो दानिश एक्के साथ बोललै । फेनू दोनों सोफा सें उठी ठाड़ों भेलै ।

“अच्छा भोरे मुलाकात होतै, सात साढ़े सात बजे तांय यहाँ आवी जा ।” फैसल नें ऊ दानों सें हाथ मिलैतें कहलकै ।

अगला सुबह हंगामा भरलौं छेलै । फैसल एकदम भोरे-भोर पाँच बजे उठी गेलों छेलै आरो तैयारी में लगी गेलों छेलै । ब्रेशा ठीक सवा छों बजे ओकरो यहाँ पहुँचली छेलै । ठीक सात बजे पुलिस रों अट्ठाइस जवानो राइफल लेलें वहाँ आवी गेलै । कुछ के पास तें मशीनगनो छेलै । सात बजी कें दस मिनिट पर दानिश ऐलै आरो इन्सपेक्टर शर्मा सात बजी कें पैंतीस पर पहुँचलै ।

“तें हुजूर इखनी तशरीफ लानी रहलौं छोंत ।” ब्रेशां इन्सपेक्टर शर्मा कें आड़े हाथो लेतें कहलकै ।

“ऊ, जरा आँख खुलै में देर होय गेलै ।”

“आँख खोली कें सुतना छेलौं, ताकि देर नै हुएँ ।”

“ब्रेशा, ई वक्ती तोहें इन्सपेक्टर साहब रों मूड मत खराब करों” फैसल ने ब्रेशा दिश होतें कहलकै, “तोहें सब्भे लें चाय बनावों, मजकि जल्दी, कैन्हें कि समय एकदम कम छै ।”

पौने आठ बजे डी. एम शशिभूषण सिंह खड़गाहा आरो एस. डी. ओ उमेश राय भी आवी गेलै ।

तबें फैसल सब्भे लोगों सें कहलकै, “इन्सपेक्टर साहब आरो दानिश पुलिस कें कमाण्ड करतै । हिनका सिनी जंगल रों पच्छिम हिस्सा सें भीतर दाखिल होतै । इन्सपेक्टर साहब, कल हमरा सिनी जै ठां वकरम सें मिललौं छेलियै, आय्यो वहीं ठां वकरम तोरा सिनी के इन्तजार करी रहलौं होन्हौं । तोरा सिनी खामोशी साथें ओकरो साथ होय लियौ आरो जहाँ तांय संभव हुआँ, गोली नै चलैय्यो । हम्में खून खराबा नै चाहै छी । होन्हौं कें दुनियाँ में युद्ध, धर्म, जाति, राजनीति

कें लै कें एतन्हें खून खराबी होय चुकलों छै कि इतिहास के पन्ना-पन्ना लहू से लथपथ छै ।

“बिना गोली चलैनें जो अपराधी गिरफ्तार होय कें काबू में आवी जाय छै, तें एकरा से बढिया की हुएँ पारें । होना कें मजबूरी के हालत में गोली चलैवो उचित छै । हमरा सिनी से पहिलें तोरा सिनी ऊ रहस्यमय ठिकानों पर पहुँची जैवौ, तें हमरा सिनी के इन्तजार करियो । तहखाना रों पता लगाना छै । एकरों लें सबसे पहिलें अन्दर हममें जैवै । कैन्हें कि सब्भे टा कार्यवाही हममें आपनों जिम्मेदारी पर करी रहलौ छियै । तोरा सिनी के जान कें, रिस्क के तौर पर, खतरा में नै डालें लें चाहै छियो ।”

“मजकि तोरों जान तें हमरे लेली नै, देश आरो राष्ट्रो लेली होने कीमती छै ।” एस. डी. ओ उमेश राय नें फैसल कें समझैलकै ।

“धन्यवाद, ई सब हम्मू समझी रहलौ छियै, मजकि इखनी जे कुछ हममें कहलें छियै, वही पर अमल होना चाही । दानिश, ई ला, ई रिवाल्वर तोहीं रखों । आबें हमरा सिनी चलौ ।”

“जरूर ।” आरो सब्भे उठी गेलै । इन्सपेक्टर शर्मा आरो दानिश दू दर्जन पुलिस साथें दू जीपों पर सवार होय पहिलें निकललै । एक पर डिस्ट्रिक्ट मजिस्ट्रेट शशिभूषण खड़गाहा आरो एस. डी. ओ. उमेश सवार सवार होलै । वही पर पुलिस रों दो चार जवानो चढ़लै, जेकरा कमाण्डो कहलौ जाय छै । है सिनी डी. एम आरो एस. डी. ओ. साथें ऐलें छेलै ।

फैसल नें इस्कूटर से जाय के फैसला करलें छेलै, से ऊ इस्कूटर दिश बढलौ छेलै कि डी. आई. जी. अवधेश सिंह वहाँ पहुँची गेलै ।

“तोहें ?” फैसल नें हैरत से पूछलकै । डी. एम. आरो एस. डी. ओ. जीप से उतरी ऐलै । कमाण्डो पहिलें जीप से उतरी कें डी. आई. जी. कें सलामी दिऐँ लागलौ छेलै ।

“तोरों कल के बातों से हममें बेहद चिन्तित होय गेलौ छियै ।

आपनों स्वाभाविक बेचैनी कें नै दबाबें पारलिये, यही लें हम्मू तोरों मुहिम में शामिल होय लें आवी गेलां ।”

“मजकि तोहें ?”

“तें तोहें की समझै छौ, हम्में बूढ़ों होय गेलों छियै” डी. आई. जी. अवधेश सिंह कहकहा लगैतें कहलकै, “अभी हमरा में बहुत ताकत छै । हम्में अय्यों शेर रों शिकार पर जावें सकै छी । यै लेली हमरों फिकिर करै के जरूरत नै छै । हम्में तोरों सिनी के साथें चली रहलौ छी । फेनू तोरों कार गर्दियो देखै लें चाहे छी । हिन्नें तोहें कै एक ठो मार्के के काम करलें छौ । पिछुलका गिद्धवाला केस तोहीं हल करलें छौ । अखबारों में एकरों खुब्बे चर्चा रहलै । आबें जंगल में बैगन तोड़ी कें सामान लूटै के केस हम्में आपनों आँखीं सें देखै लें चाहै छियै कि केना ई हल करलौ जाय छै । नै जानौं, ऊ सब के लोग छेकै जे समाज कें खोखला आरो सरकार कें नुकसान पहुँचाय पर तुललौ होलौ छै । पिछला तीन-चार साल से स्थानीय प्रशासन बड़ी छानबीन करी रहलौ छै कि आखिर मालगाड़ी सें बैगन के बैगन सामान कहाँ आरो केना गायब होय जाय छै । रेलवे विभागो हरजाना भरतें-भरतें तंग आवी गेलौ छै । जों ई मुहिम तोहें जीती लै छौ, तें ई बड़का कारनामा होतै ।”

“यै में कारनामा के कोय बात नै छै; ई तें हमरों फर्ज छेकै कि समाज रों लुटेरा खूनी आरो बुरा आदमी कें खात्मा करौं । आवों एक कप चाय तें पीवी ला । पुलिस पार्टी आगू जाय चुकलौ छै । हमरौ जल्दिये पहुँचना छै ।”

“नै अभी चाय नै । लौटी कें चाय के दौर चलतै । होन्हौं कें घरों में चाय पीविये कें चललौ छी; आवों, तोहें हमरों जीपों पर आवी जा । इस्कूटर छोड़ी दौ ।”

फैसल डी. आई. जी. के जीपों पर बैठी गेलै आरो रवाना होय गेलै ।

जंगल सें कुछ दूरहे फैसल नें जीप कें रोकवाय देलकै आरो

सब पैदले आगू बढ़लै । जबें पूरब दिशां सें शीशम गाछी ओर हुनका हिसनी बढ़ी रहलौं छेलै, तखनिये दू आदमी रायफल लेलें हुनका सिनी के सामना आवी कें खाड़ों होय गेलै, आरो पूछलकै,” तोरा सिनी कहाँ जाय रहलौं छौ ?”

“शिकार खेलै वास्तें जग्घों तलाशी रहलौं छियै । तोहें दोनों के छेकौ ?” फैसल नें लगले पूछलकै ।

“हम्में वन-विभाग रों आदमी छेकियै । हिन्नें शिकार खेलना मना छै ।”

“हमरों पास शिकार खेलै के परमिट छै ।”

“मजकि है इलाका खतरनाक छै । हम्में तोरा सिनी कें अन्दर नै जावै लें दिऐं पारौं । अन्दर चीता आरो दूसरों-दूसरों जंगली जानवर भरलौं पड़लौं छै । जों तोहें अन्दर गेलौं तें जान कें जमानत मिलना मुशिकल छै, आरो ई हमरों जिम्मेदारी छेकै कि हम्में अन्दर जाय सें रोकौं ।”

“मतरकि हम्में तें शिकार खेलै के इरादाहै सें ऐलौं होलौं छियै ।”

“जों शिकार खेलनाहैं छौ, तें जंगल के किनारी-किनारी पंक्षी, मुर्ग आरो खरगोश के शिकार करौं ।”

“नै हम्में चीता के शिकार खेलै लें ऐलौं छियै । हिन्नें जंगल घन्नों नै छै । मचान बनाय लेली भीतर जाय कें जग्घों देखै लें पड़तै ।

“हम्में तोरा आगू नै जावें देभौं ।” ई कहतहैं दोनों नें रायफल तानी लेलकै ।

“तोरा दोनों होश में छौ की नै । ई की बदतमीजी छेकै ?” डी. आई. जी. अवधेश सिंह गुस्सा सें काँपें लागलै ।

“जनाब, तोहें गोस्सावों नै ।” फैसल नें डी. आई. जी. कें खामोश रहै के इशारा करलकै ।

“अच्छा डाकबंगला कन्नें छै ?” फैसल ने पूछलकै ।

“हुन्नें ।” दोनों ने बायां दिश इशारा करलें छेलै । बस यही

ऊ क्षण छेले, जबें बिजली के गति सें फैसल नें दोनों के रायफल छीनतें आगू बढ़ी गेलै । फेनू ऊ वहाँ तेजी सें पलटलौ छेलै आरो रायफल रौ रुख दोनों दिश करी छेलै छेलै ।

“आपनों हाथ के ऊपर उठावों ।” फैसल नें गुर्रतें कहलें छेलै ।

ई सब एतै तेजी सें होलै कि केकरहौ कुछ समझै में नै ऐलों छेलै । पुलिस रौ जवान आरो डी. आई. जी. अवधेश सिंह के अंगरक्षको हैरान रही गेलै ।

“तोर सिनी ई दोनों कें बांधी लें” फैसल नें पुलिस के जवान सें कहलकै आरो ई दोनों के तलाशियो लै ला ।

जबें ऊ दोनों रस्सी सें जकड़ी देलौ गेलै, तें फैसल दोनों के नगीच ऐलै । आपनों दायां हाथ वै एक रौ कनपट्टी लुग लै गेलै आरो अंगूठा सें दबाब डालें लागलै । कुछवे देरों में ऊ बेहोश होय गेलै । यही हरकत वै दूसरों आदमियो के साथ करलकै ।

“ई की करलौ तोहें ? ई दोनों वन-विभाग के आदमी छेलै आरो हमरे सब के भलाय लें हमरा सिनी कें रोकी रहलौ छेलै ।” डी. आई. जी. के बोली में झुंझलाहट छेलै ।

“हमें खाली एतन्हें कहै लें चाहभौं कि ई दोनों आदमी वन-विभाग रौ आदमी नै छेलै, बलुक सरदार के आदमी छेकै । अभी तें आगू ई किसिम के कत्तें लोग मिलै वाला छै । हमरा सिनी कें बेहद चौकन्ना रहना चाही ।”

फेनू फैसल नें पुलिस रौ जवान सें कहलकै, “दोनों बेहोश आदमी कें उठावों आरो झाड़ी में डाली दौ, ताकि हिन्नें सें गुजरैवाला के नजर ई दोनों पर नै पड़ें । ई दोनों कें होश में आवै में अभी तीन घण्टा लगतै ।”

आदेश मिलना छेलै कि जवान दोनों कें झाड़ी में डाली कें लौटी ऐलै ।

ठीक शीशम गाछी के नगीच ऊ सब कें तीन आदमी आरो

नजर ऐलै । यहाँ ठां वही सब बात होन्है केँ घटलों छेलै आरो फैसल नें होन्है केँ दू आदमी केँ बेहोश करी, तेसरो आदमी केँ अपना कब्जा में लेतें पूछलें छेलै “तहखाना तक जाय के रास्ता बतावों, नै तें रिवाल्वर के छवो गोली तोरो खोपड़ी में उतारी देभौं ।”

“हम्में कोय तहखाना-वहखाना के नै जानै छियै । हमरा सिनी वन-विभाग के आदमी छेकियै । हमरा सिनी पर ज्यादाती करी केँ तोहें अच्छा काम नै करी रहलौ छौ ।” ऊ आदमी के आवाज में कटियो टा डोर नै छेलै ।

“ठीक छै, सरदार के बारे में बतावों ।” फैसल नें पूछलकै ।

“तोहें केन्हों बात करी रहलौ छौ ? सरदार, तहखाना, ई सब पागले के बात हेनौ छेकै ।”

“तें ठीक छै, हम्में आपनों पागलपन दिखावै छियौं ।” एतना कही केँ फैसल नें जेबी सें रुमाल निकाललकै आरो ओकरो मुँहों में ठूसी देलकै, आरो फैनू देसरो जेबी सें एक ठो लम्बा चाकू निकाललकै ।

“ई चाकू देखी रहलौ छौ नी । हम्में कहै छियौं कि अभियो मौका छौं—हम्में जे कुछ पूछी रहलौ छियौं, बोकरो सीधा-सीधा जबाब दें । होना केँ एतें हम्में जरूरे जानै छियै कि सरदार ई जंगल में की कुछ करी रहलौ छै । मालगाड़ी केँ लूटै सें लै केँ ओरो दूसरो-दूसरो अपराधो कर्म तक के हमरा पता छै । हमरा यहू पता छै कि शीशम रौ गाछ सें ई जे रस्सी लटकी रहलौ छै, ओकरा सें खतरा के खबर तहखाना तांय पहुँचैलौ जाय छै । आबें बोलौं कि तोहें हमरो सवाल के सही-सही जबाब दै छौ कि नै ।”

एतना सब बतैला के बादो ऊ आदमी इन्कार में आपनों मूड़ी हिललकै ।

ठीक यही वक्ती झाड़ी में हरकत होलै । बंधलों आरो बेहोश आदमी केँ वांही पर छोड़ी केँ ऊ सब आदमी रायफल, रिवाल्वर हाथों में ले लें गाछी के आँटों में होय गेलै । सबसें आगू वकरम छेलै, ओकरो पीछू इन्सपेक्टर अंजनी शर्मा आरनी झाड़ी सिनी सें निकली केँ

सामना आवी गेलै । वैं ऊ तीनों आदमी कें बड़ी आश्चर्य सें देखवो करी रहलौ छेलै ।

गाछी के पीछू सें फैसल आरनियो सामना में आबी गेलै । वैं वकरम सें पूछलकै, “की रहलै ?”

“कुछुवो पता नै चललै । पश्चिम के तरफ सें ई सीध में हमरा सिनी आवी रहलौ छियै । तहखाना रों कोय संकेत कन्हौं नै बुझैलै । ई लोग सिनी के छेकै ?”

“यही शीशम गाछी के नीचें मिललौ छै ।”

“तबें तें ई खास आदमी छेकै ।” वकरम नें कहलकै, ई गाछ सें आगू तहखाना तांय जाय वाला रास्ता रों पता यै सिनी कें जरूरे मालूम होतै । यै सिनी सें पूछौ ।”

“यैं कुछुवो बतावै सें इन्कार करी रहलौ छै ।”

“तें, यै सिनी कें मारै के जरूरत छै । ई सब गद्दार छेकै, जरो टा रहम करै के जरूरत नै छै ।”

“तोहें ठीक कहै छौ वकरम । मतरकि ई सब मारो सें सच्चाई उगलै वाला नै बुझावै छै । फेनू हमरा सिनी के पास समैयो कम छै । अभी तें सब लोग अनजान छै । जों ओकरा सिनी कें एकरों भनक मिली जाय छै कि हमरा सिनी यहाँ तक आवी गेलौ छियै, तें ऊ सब झाड़ी सिनी सें निकली कें हमरै सिनी कें चाटी जैथौं । यही सें एकरा हम्में मारी कें खतम नै करवै, मतरकि अधमरुओं जरूरे करी दै छियै, ताकि आपनों घाव के तकलीफ कें बर्दास्त करतें रहें ।” आरो फैसल ने आपनों वज्रवाला घूसा सें ओकरों बायाँ हाथ के कलाई भसकाय देलकै ।

ऊ आदमी दरदों सें सिसकी भरना शुरु करी देलकै, आरो आपनों फूली गेलौ कलाई कें देखें लागलै

कच.....ई दाफी फैसल नें ओकरों अंगूठा कें भसकाय देलकै ।

“अभियो बतावै छौ कि नै ?”

यै फेनू इन्कार में मूड़ी हिलाय देलकै ।

“ठीक छै, नै बतावों ।” आरो ई कही फैसल नें एक जबरदस्त झापड़ ओकरो कान पर देलकै । लागलै, ओकरो काने उड़ी गेलों रहें । कान सें खून गिरें लागलें छेलै ।

“आबें बतैवौ कि फेनू.... ।” फैसल नें पूछलकै ।

“एकरा छोड़ी दौ । तोहें जे कुछुवो करी रहलें छौं, ऊ इन्सानियत के एकदम खिलाफ छै ।” डी. आई. जी. अवधेश सिंह ने फैसल कें रोकै लें चाहलकै ।

“तोरा बीच-बचाव करै के कोय जरूरत नै छै । हममें आपनों देश आरो राष्ट्र के हित के हेनों विरोधी साथें रहम करै लें नै चाहै छियै । ई सब इन्सानियत के लायके कहाँ छै । अबकी बार तें हममें एकरों आँखें फोड़ै लें जाय रहलें छियै ।”

ई कही फैसल नें जेन्हें आपनों हाथ बढ़ैलकै, ऊ आदमी जोर-जोर सें मूड़ी हिलावें लागलै । तें, फैसल नें आपनों हाथ रोकतें कहलकै, अभियो बतावै छौ कि नै ?” अबकी दाफी वै हों में मूड़ी हिलैलकै ।

ई देखी वकरम नें ओकरो मूँ में ठूसलों रूमाल कें निकाली देलकै ।

“जल्दी सें बातवों कि तहखाना रों रास्ता कन्ने सें छै ? तोरों माथा पर मौत मँडराय रहलें छौं । हममें नै चाहै छी कि तोरों मौत हो जाय । सच- सच बतैला पर हममें तोरों चोट वास्तें दवाय-दारुओ के व्यवस्था करे पारों ।”

“यै लें हमरा साथ लै जाय लें लागथों, वरना कैन्हों कें तोरा सिनी वै ठां नें पहुँचें सकै छौ ।” ऊ दर्द सें कुरैहतें होलों बोललै । चोट सें ओकरो कनपट्टी फूली कें तुमड़ी होय गेलों छेलै ।

“पहिलें ई बतावों कि ऊ तहखाना के भीतर की छै ?”

“हममें सिरिफ एक कोठरी में दू दाफी गेलों छियै; वहू में आँखी पर पट्टी बाँधिये कें हमरा वहाँ पहुँचैलों गेलों छेलै । वै ठां दीवारों सें सरदार के आवाज सुनाय पड़े छै । हमरों काम तें माल कें

गाछी लुग सें तहखाना के रास्ता तांय पहुँचैवों भर छेकै ।”

“जे हुएँ, आबें जल्दी करों । इलाज वास्ते तोरा अस्पतालो पहुँचैना जरूरी छै ।”

ऊ आदमी रास्ता दिखैतें हुएँ सबके एक झाड़ी तक लानलकै । बाहर सें देखला पर ई झाड़ी एकदम घन्नों छेलै । फेनू ऊ आदमी के हिदायत पर सब्भे आदमी बाहरे रूकी गेलै आरो झाड़ी के ओट में होय गेलै । झाड़ी के नगीच पहुँची केँ ऊ आदमी हाँक देलकै, “गोविन्दा, अय गोविन्दा ।”

वकरम ओकरा एक हाथों सें सहारा छेलें होलों छेलै आरो आपनों दोसरोँ हाथों में रायफल लेलें होलों छेलै ।

“के छेकै ?” गोविन्दा झाड़ी सें बाहर निकलतें बोललै । ओकरों हाथ में मशीनगन छेलै ।

“हम्में वकरम छेकियै । एकरा चीता घेरी लेलें छेलै । बचाव में एकरों कलाई आरो कनपट्टी पर भारी चोट ऐलों छै ।”

“ओहो, ठहरोँ, हम्में अभी तुरत अन्दर खबर करै छियै ।” ई कहीं गोविन्दा जैन्हें पलटलै कि वकरम नें रायफल रों कुन्दा गोविन्दा के माथों सें टिकाय देलकै, जेकरों कारण वह कटलों ठारी जकां धरती पर गिरी पड़लै ।

ई देखतें फैसल आरो सब्भे लोग वहाँ एकदम करीब पहुँची गेलै ।

“गोविन्दा केँ बाँधी दौ आरो एकरों मुँहों में कपड़ो ठूसी दौ” फैसल नें पुलिस के जवानों दिश होतेँ कहलकै, “आरो तोरा में तीन आदमीं एकरा अस्पताल पहुँचावों । सदर अस्पताल में डाक्टर हेमन्त सिन्हा सिविल सर्जन छै, हुनका हमरोँ नाम बतैय्यौ आकि हुनी नहियो रहै, तें कोय बात नै, दूसरे डाक्टरों सें जल्दी-से-जल्दी मेडिकल मदद वास्ते कहियौ । दू आदमी तें एकरा कंधा पर उठाय ला, बाकी एक रास्ता रों निगरानी करतेँ चलियो । हों, तोरोँ नाम की छेकौं ?” फैसल नें ऊ घायल आदमी सें पूछलकै ।

“डलियास ।”

“अच्छा आवें एकरा तोरा तीनों लै जा । गाल सें गल्ला तांय फूली गेलों छै ।”

आदेश पावी कें तीन जवान डलियास कें लै कें वै ठां सें निकली गेलै ।

“हमें झाड़ी में जाय कें पहिलें देखै छियै, फेनू तय करवै कि भीतर तांय केना दुकलों जाय । होना कें झाड़ी रों फैलाव बहुते ज्यादा छै ।” ई कही फैसल झाड़ी रों अन्दर घुसी गेलै ।

ऊ एक टा बड़ों रं कोठरी छेलै, जेकरों दीवार लकड़ी सें बनलें होलें छेलै । दायां किनारी पर एक ठो कुर्सी राखलें होलें छेलै आरो दीवार से दूर रायफल सिनी लटकलें होलें छेलै ।

झाड़ी सें बाहर आवी कें वै डी. आई. जी. अवधेश सिंह, डी. एम. शशिभूषण सिंह खड़गाहा, आरो दानिश से कहलकै,” ई झाड़ी खास तोरों पर बनलें गेलौ छै, मतरकि एकरा बेतरतीव छोड़ी देलें गेलों छै । होना कें भीतर में एक ठो साफ-सुथरा आरो बड़ों रं कोठरी छै । तोरा सिनी भीतर चलें, मतरकि एकदम खामोश रहतें । हमरा तहखाना रों रास्ता तलाशना छै । भीतर दुकी कें तोरा सिनी एक शब्द नै निकालवौ । संभव छै, ऊ आवाज नीचें तांय पहुँची जाय आरो हममें ओकरा सावधान नै करै लें चाहे छियै । अभी तांय जेटा सफलता मिललौ छै, हौ ऊ सब के बेखबरी के कारणें । यहाँ बेखबरी के फायदा उठाय कें हममें असल अपराधी कें पकड़ै लें चाहे छियै ।

“ठीक छै ।” सब्भें एक्के साथ कहलकै ।

“पुलिस रों जवान आरो कमाण्डर बाहरे पहरा देतै । जों कोय्यो हिन्नें आवें, तें बिना कोय सोच के गोली मारी देलें जाय ।” फेसल नें कहलकै ।

आरो सब एक्के साथ झाड़ी में दुकी गेलै । डी. एम. शशिभूषण सिंह खड़गाहा हैरत सें कुछ बोलै लें जय्ये रहलें छेलै कि फैसल नें ठोरों पर अंगुली राखी कें हुनका चुप्पे रहै के इशारा करलकै । फेनू तहखाना

रों रास्ता तलाशें लागलै ।

पूरा कोठरी ठोकी-बजाय कें देखी लेलों गेलै, मतरकि ओकरा में रास्ता ने मिललै । सब हैरान-परेशान होय कें एक-दूसरा के चेहरा देखवो करी रहलों छेलै ।

कि एकाएक फैसल रों नजर दीवार पर लगलों हैंगर पर ठहरी गेलै । बगल में लकड़ी के दीवार में एकटा हैंगर गड़लों होलों छेलै जे कपड़ा आरनी टाँगे में काम ऐतें होतै । मतरकि है कोठरी आरामगृह तें नै छेलै कि यहाँ कोय कपड़ा टाँगे पारें । फैसल नें एक क्षण में ई सब सोची लेलकै । फेनू हाथ बढ़ाय कें हैंगर खींची लेलकै ।

‘खट’ रों आवाज के साथें कोठरी रों बीचो-बीच के फर्श हटी गेलै । चार फीट चौड़ा खाली स्थान दिखावें लागलै । दानिश तें गिरतें-गिरतें बचलै, डी. आई. जी अगर ओकरा थामी नै लेलें होतियै ।

फैसल ने निश्चिन्ती के साँस लेलकै । फेनू ऊ आगू बढ़ी कें खाली स्थान में झॉकें लागलै । नीचें जाय वास्तें सीढ़ी बनलों होलों छेलै । वैं तमाम लोगों दिश देखलकै आरो आपनों गोड़ खाली स्थान के सीढ़ी दिश बढ़ाय देलकै । तखनी ओकरो एक हाथों में रिवाल्वर छेलै ।

पाँच सीढ़ी नीचे उतरला रों बाद ऊ जमीनों पर आवी गेलै । आसपास कोय्यों नै छेलै । सामनाहै दस गज के एक लम्बा पतला गल्ली नजर आवी रहलों छेलै । ओकरो आगू शायत कोठरी छेलै । फैसल आगू बढ़ै के बजाय सीढ़ी चढ़ी कें ऊपर आवी गेलै आरो ऊ खाली जग्घों सें आपनों मूड़ी ऊपर करी सब्भे कें आपनों पीछू आवै के इशारा करलकै । एकेक करी कें जबें सब्भे तहखाना में उतरी गेलै, तें वैं फुसफुसैतें हुएँ कहलकै, “ई गल्ली सें आगू बढ़ना छै, बस समझों कि मौत रों मुँहों में आवी गेलों छों । यही लें साव- धान रहै के जरूरत छै । आपनों-आपनों रिवाल्वर सब आपनों हाथों में राखी ला ।”

फैसल हाथों में रिवाल्वर लेलें आगू बढ़लै । ओकरो पीछू सब्भे लोग चौकन्ना होलें आपनों गोड़ बढ़ाय रहलों छेलै ।

गली रों छोर पर एकटा पहलवाननुमा आदमी स्टूल पर बैठलौं किताब पढ़ी रहलौं छेलै । ओकरों नगीचें रायफल राखलौं छेलै । फैसल साथें ओकरों सब्भे लोग एतन्हें आहिस्ता सें गली में आगू बढ़ी रहलौं छेलै कि आदमी के खबरो तांय नै हुएँ पारलै, या तें फेनू ऊ पढ़ै में एतहै लीन छेलै कि ओकरा ऊ सबके आवै के भनक तांय नै हुएँ पारलै । फैसल नें रायफल कें उलटा पकड़ी कें ओकरों माथा पर एतहै जोर सें दै मारलकै कि वैं मूड़ियो नै उठावें सकलकै आरो वही ठां लुढ़की कें नीचे गिरी पड़लै ।

ओकरों रायफल पर कब्जा करला के बाद फैसल नें चारो दिश आँख दौड़लकै । ई तहखाना की छेलै, एक ठो बड़का मकान छेलै, जेकरों चारो दिश कोठरी बनलौं होलौं छेलै । यै ठां घुटन के कोय एहसासो नै होय रहलौं छेलै । कोय रास्ता सें ऑक्सीजन जरूरे पहुँची रहलौं छेलै ।

फैसल साथें सब्भे लोगें महसूस करलकै कि एक कोठरी सें कुछ लोगों के बोलै के आवाज आवी रहलौं छै । आवाज सुनतहै फैसल ऊ कोठरी दिश बढ़ी गेलै ।

कोठरी भिड़कलौं होलौं छेलै आरो दरवाजा के भीतर सें आदमी सिनी के आवाज आवी रहलौं छेलै ।

“जों तोहें निश्चिन्त छों, तें हमरौ कोय चिन्ता नै छै ।” एक आवाज सुनाय पड़लै ।

“हम्में कही चुकलौं छियौं कि यै में चिन्ता के कोय बाते नै छै । सी. आई. डी वाला हिन्ने आवे नै पारें ।”

ई आवाज शाहिद के छेलै । निश्चिन्त होय लें फैसल नें इन्स्पेक्टर शर्मा दिश देखलकै । वैं स्वीकार में मूड़ी हिलाय देलकै ।

“खैर जे हुएँ, यै ठां हमरा सिनी सुरक्षित छियै, हमरा तें तोरों फिकिर होय रहलौं छेलै कि हमरों आदमी के गलती सें कहीं तोरा परेशानी नै होय जाँव ।” पहिलकों वाला आवाजें कहलकै ।

“नै, नै, हमरा पर कहीं सें कोय शंका नै हुएँ पारें, हम्में

क्रिया-करम कथी लें करलें छियै । फेनू ई तें किसिम के मदद छेलै ।”

“ई बात चिन्ता के नै छेकै । सी. आई. डी. वाला सें लहास लानी कें तोहें गलती करलें छेलौ । होना कें आबें ई सब बात जावें दौ । तें, हों मिस्टर अफजल, ई दाफी तोहें कर्ते टाका लै कें ऐलें होलौ छै ।”

“अढ़ाय लाख तें अभी लै ला । बाकी टाका डिलेवरी के वक्ती आकि फेनू एक दिन के बाद चुकाय देभौ ।”

“कोय बात नै, तोरा पर भरोसा छै । हमरों शुरुआती दौर के तोहें ग्राहक छेकौ । लानो टाका, दा ।”

ठीक तखनिये फैसल नें लात मारी कें दरवाजा खोली देलकै आरो बिजली के गति सें ऊ कोठरी के भीतर दाखिल होय गेलै । एक हाथ में रायफल आरो दूसरों हाथ में रिवाल्वर के रूख, कोठरी के लोगों दिश करतें हुएँ वै कहलकै, “आबें खेल खत्म होय चुकलौ । सी. आई. डी के लोग यहुँ ठां पहुँची चुकलौ छै ।”

शाहिद नें आपनों हाथ रिवाल्वर दिश लै जाय लें चहलकै, मतरकि तभिये फैसल के रिवाल्वर सें एक शोला निकललै आरो शाहिद के हाथ तखनिये झूली गेलै ।

“तोरा सिनी हाथ उठैले राखौ ।” ई कहतें फैसल दरवाजा के सामना सें हटी गेलै । ओकरो हटहैं बाकी आरो लोग कोठरी में घुसी ऐलै ।

“है हिन्नें, हवाई शर्ट पिन्हलें घायल हाथ वाला शाहिद छेकै आरो ई दूसरों अफजल छेकै । आरो सरदार..... ऊ नकाब में छै । पहिलें ई सिनी के हाथों में हथकड़ी डाली दौ, फेनू सरदार के चेहरो देखी लेवै ।”

फैसल के एतना कहतै सब, ऊ तीनों लोग दिश बढ़लै । कोठरी में बस वहा तीनों छेलै । वहाँ दस कुर्सी सलीका सें राखलौ गेलौ छेलै । वैमें एक रिवाल्विंग कुर्सी सबसें अलग-थलग छेलै । जे पर नकाबपोश बैठलौ होलौ छेलै । हथियार सें लैस एतें सब लोग कोठरी

में आवी गेलों छेलै कि ऊ तीनों कें हरकत करै के मौकाहै नै मिललै ।

ऊ तीनों के हाथ पीठी दिश लानी कें बांधी देलें गेलै । आबें फैसल ऊ नकाबपोश दिश बढ़लै आरो एक झटकाहै सें ओकरो चेहरा सें नकाब जेन्हें हटलकै, तें एस. डी. ओ उमेश राय के मुँहों सें हाठाते चीख निकली पड़लै, “जगदीश प्रसाद ।”

“कौन जगदीश प्रसाद ?” फैसल नें आश्चर्य सें पूछलकै ।

“वन-विभाग अधिकारी ।”

“ओहो ।” फैसल नें ओकरो चेहरा उठैतें हुएँ कहलकै, “तें सरदार हिनिये छेकात, आरो हिनिये पिछुलका छः सालों में करोड़ो के डकैती करी चुकलें छोंत !”

“मतरकि एकरों दूसरों साथी सिनी नजर नै आवी रहलें छै । डी. एम. शशिभूषण सिंह खड़गाहां पूछलकै ।

“जे लोगों कें हमरा सिनी बेहोश करलें होलें छियै, वही सब तें एकरों आदमी छेलै । एक खास आदमी शेरघाटी थाना के दरोगा शाहिद छेकै । आरो कुछ लोग होतै । जबें सरगना हाथ लागी गेलें छै, तें एकरों वकिया साथी केना बचें पारें ।”

वहाँ, वही कोठरी सें मिलतें एक आरो कोठरी छेलै । जबें फैसल वें में दाखिल होलै, तें सामनाहें में ओकरा खाली जग्घों दिखलै । एक खुफिया रास्ताहौ ऊ कोठरी सें कहीं आरो गेलें छेलै । फैसल इन्स्पेक्टर आरनी कें हिदायत दिऐँ लागलै, “तोहें ई तहखाना के हर कोठरी के जाँच-पड़ताल करों । सामान के साथे-साथ कागजो देखते जाना छै । ऊपर सें पुलिस के कुछ जवानों कें यहाँ लै आनों । आरो ई तीनों कें कमाण्डो के हवाला करी दौ, साथे-साथ यहू कही दौ कि यै सिनी पर कड़ा निगरानी राखै के जरूरत छै । आबें हम्में ई खुफिया रास्ता सें आगू बढ़ी रहलें छियौं । देखै छियै कि एकरो अन्त आखिर कहाँ होय छै ।”

फेनू ऊ खुफिया रास्ता में उतरी गेलै । ई रास्ता टेढ़ों-मेढ़ों

छेलै । ओकरा करीब-करीब दस मिनट तांय रास्ता पर चलै लें पड़लै आरो जबें ऊ एकरा सें बाहर ऐलै, तें एकटा सजल्लो-सजैलो कोठरी में छेलै । जायजा लेला पर ओकरा पता चललै—ऊ कोठरी वन विभाग के अधिकारी के शयनकक्ष छेलै ।

फैसल नें खिड़की खोललकै, बाहर दिश झाँकलकै आरो ओकरा अन्दाजा लगैतें देर नै लागलै कि ऊ तखनी डाकबंगला में छेलै ।

फैसल तहखाना में जबें वापिसे पहुँचलै तें वहाँ आरो लोग ओकरो इन्तजार करी रहलें छेलै । वैं ऊ रास्ता के बारे में बताय कें इन्सपेक्टर सें पूछलकै, “यहाँ कुछ हाथ लगलें ?”

“बहुत कुछ चोरी आरो लूट के माल भरलें पड़लें छै । कुछ फाइलो मिललें छै । एक में ऊ सब आदमी के नाम आरो पता दर्ज छै । आरो हों, ऊ पहलवाननुमा आदमी कें होश आवी गेलें छै, ऊ गवाहियो दै वास्तें तैयार छै । हीरा माँझी आरो दूसरों-दूसरों सजा पावै वाला के बारे में पहलवानें बतैलें छै कि जे लोगों के मूड़ी काटी ले लें जाय छेलै, हुनको धड़ पानी में बहाय देलें जाय छै, या फेनू जमीन में गाड़ी देलें जाय छै । एक कुँआ छै । सजा के तौर पर अधिकांश कें मारी कें वही कुँआ में डाली देलें जाय छै । यहीं कहीं ई जंगल में ऊ कुँआ छै ।” इन्सपेक्टर शर्मा नें विस्तार सें सब बतैलकै ।

“तें, एक बातों के आरो जानकारी दा कि ये ठां सें माल कौन रास्ता सें बाहर लै जेलें जाय छै ?” फैसल नें पहलवान सें पूछलकै ।

“खुफिया रास्ता सें, जे आधों किलो मीटर के दूरी पर एक ठो मन्दिर के नगीच निकलै छै । वहीं ठां गोदाम बनलें होलें छै । हमरा ऊ सब दिखलाय में कोय आपत्ति नै छै ।”

“चलें, यहू मालूम होय गेलै । आबें हमरों काम खतम होलै । बकिया कार्यवाही आबें इन्सपेक्टर साहब तोहें खुददे करों ।” फैसल आगू बढ़तें हुँ बोललै ।

“ई सब अजीब आरो सपना नाँखी बुझावै छै ।” डी. आई. जी. अवधेश सिंह बोललै ।

“हल करै में कहीं कोय रुकावट नै ऐलै, यही लें ई अजीब रं बुझावै छौं ।”

“पिछला कै सालों सें हमरा सिनी मालगाड़ी कें तोड़लें जाय वाला घटना सें परेशान छेलियै । आय ओकरो जेना अंत होय गेलै ।” एस. डी. ओ. उमेश राय बोली पड़लै ।

“तोहें जे रं से एत्तें बड़ों अपराध के खेल कें अंत दै छेलें छौं ओकरा सें तोहें, प्रशासन, समाज, देश, सब्भे के बड़ा भारी उपकार करलें छौं । आभारी छियौं ।” डी. एम. शशिभूषण सिंह खड़गाहा फैसल सें हाथ मिलैतें कहलकै ।

“ई केस में तोरा सिनी के बहुत मदद मिललें छै, एकरों वास्तें हम्मूं तोरा सिनी के बड़ी आभारी छी । फैसल नें भी सब्भे के शुक्रिया अदा करलकै । आरो तबें दानिश सें बोललै, “चलो भी, बड़्डी देर होय गेलै । ब्रेशा इन्तजारी में होतै आरो चिन्ताहौ करतें होतै ।” एतना कही दोनों वहाँ सें वापिस होय गेलै ।

फैसल के जीप तेजी सें जंगल के बीच सें निकली रहलें छेलै आरो ओकरौ सें ज्यादा तेज ओकरो दिमाग चली रहलें छेलै । खास करी कें जंगल रों सरदार के बारे में घुरी-घुरी सोची रहलें छेलै, “आय देश में जगदीश प्रसाद हेनो एक्के ठो छै की । लाखों में छै । कोय जंगल के सौदा करी रहलें छै, कोय आदमी के बस्ती के, कोय नदी के पहाड़ के, कोय कलकारखाना के, आरो कत्तें तें हेनो छै कि देश के सौदा करी रहलें छै ।

“दुख तें ई छे कि हेनो जगदीश प्रसाद के चंगुल में आय लाखो लाख लोग फँसी चुकलें छै । आदमी कें पैसा चाहियो, सुख चाहियो । देश के सम्पत्ति, देश चूल्हों-भांडी में जाय, हेनो सब आदमी कें कोय मतलब नै । आरो हेने सब आदमी के सहयोग लै के बाहरी देश आय भारत के शांति भंग करै में लागलें होलें छै । कभी हैदराबाद में खून के बोहों, कभी मुम्बई में, कभी दिल्ली में, कभी छत्तीसगढ़ में ।

“है रं भला देश रहें पारें । आय देश रों उत्तरी, पश्चिमी, पूर्वी अशान्त छै । आपने देश के लोग आपने देश कें बाटै लें चाही रहलौ छै । हेनों सब आदमी कें विदेश सें धन मिली रहलौ छै । आरो ई देश के बाकी लोग डरों सें गुमसुम बनलौ होलौ छै । या तें फेनू ओकरा मदद करी रहलौ छै, है भूली कें कि हमरों देश कर्तें लहूलुहान होय रहलौ छै । आय देश में एक कश्मीर नै, सौ कश्मीर बनी गेलौ छै ।

“आखिर देश के जवान कें कहाँ-कहाँ लगैलौ जावें सकै छें । देश के सरकार पर एकरा सें कर्तें बोझों बढ़ै छै, ई सब बातों सें आबें लोगों कें जना कोय मतलबे नै रहलै । लागै छै, जना गांधी, सुभाष, भगत सिंह, चंद्रशेखर आजाद के कुर्बानिये बेकार चल्लौ गेलै । हममें तें चाहै छियै कि हमरों देश के घर-घर में अब्दुल हमदी आरो सौरभ कालिया हेनों वीर पैदा हुएँ ।

“आरो सबसें बड़ों बात कि देश के ऊ सब चेतौ, जे आपनों चुप्पी सें या मदद सें सौंसे देश कें कश्मीर बनाय पर तुललौ छै । हिन्दुस्तान में बेटा हुएँ तें हमीद और कालिया रं, बेटी हुए तें झाँसी के रानी आरो कश्मीर के रुखसाना रं । देश तें आपने समृद्ध होय जैतै, खाली एकेक भारतवासी ई तें कसम खाय लौ कि हममें नै तें समाज विरोधी काम करवै, नै तें हेनों काम में आपनों भाइयो कें मदद करवै । खूने छेकै तें की । देश के दुश्मन तें आपनों खूनो के दुमन छेकै ।

“दुर्भाग्य छै कि आय देश के कोना-कोना में, गली, मुहल्ला में, शहर-गाँव में जगदीश प्रसाद हेने आदमी के जुटान हुएँ लागलौ छै । यै में राज नेताओ कम जिम्मेदार नै छै । आपनों लाभ वास्तें देश में साम्प्रदायिक, जातिवाद फैलावै छै आरो फेनू भाषणो में एकरों विरुद्धो बोलै छै । ई सब नेता छेकै, जगदीश प्रसाद छेकै, चेहरा पर नकाब डाललें ।

“टीवी पर नंगापन, अखबार में, नंगापन, दिमाग में नंगापन, भला आवै वाला पीढ़ी के, की रं के मॉन-मिजाज होतै, सोचें पारों ।

चरित्र-निर्माण से नै तेँ किताब के मतलब रही गेलों, नै तेँ गुरु जी सिनी केँ । जड़े खतम छै, फूल-फोर की फरतै ।

“लेकिन हम्में निराश नै हुँ पारौं । हमरों मनोँ में आभियो ऊ लिखलौं पंक्ति सिनी अमित छै कि भारत जमीन रौं टुकड़ा नै, एक जीतोँ राष्ट्रपुरुष छेकै । हिमालय एकरों माथा छेकै, गोरीशंकर चोटी छेकै, कश्मीर किरीट रं छेकै, पंजाब आरो बंगाल दू विशाल कंधा छेकै, उत्तर प्रदेश, बिहार एकरों छाती छेकै । विन्ध्याचल कमर छेकै, नर्मदा करधनी, पूर्वी आरो पश्चिमी घाट दू विशाल जांघ छेकै, कन्याकुमारी एकरो चरण छेकै, समुन्दर एकरों गोड़ धोय छै, वर्षा के कारों-कारों मेघ एकरों घुंघरैलौं बाल छेकै, चान सुरुज एकरों आरती उतारै छै, शीतल सुगंधित हवां यै पर चंवर डुलावै छै । ई वन्दन रौं भूमि छेकै । अभिनंदन रौं भूमि छेकै, ई तर्पण रौं भूमि छेकै, समर्पण रौं भूमि छेकै, एकरों कंकड़-कंकड़ शिव छेकै । एकरों बूंद-बूंद गंगाजल । हम्में जीवै तेँ एकरे लें, मरवै तेँ एकरे लें ।

“की सोचवो करी रहलौं छौ ?” दानिश नेँ फैसल केँ एतेँ मौन देखी केँ टोकलकै ।

दानिश के बात सुनी फैसल जना चैत में आवी गेलों रहें, मतरकि सहज नै हुँ पारलै । बस वैँ एतनै टा कहलकै, “जे सोची रहलौं छेलियै, ऊ ई देश के हर आदमी में सोचना चाही ।”

जीप अभियो वहेँ तेजी सेँ जंगल के बीच सेँ निकली रहलौं छेलै । घर तांय पहुँचै में बस आरो कुछ देर बाकी रहलौं छै ।

